


MGA KASAKIT SA PAGPANGANAK

 Iduko nato ang atong mga ulo.

² Minahal nga Dios, mapasalamaton kaayo kami niining adlaw tungod sa dakung pagbubo sa Imong Presensiya, sa among taliwala, karon. Ug nagalaum kami, sa labing, madagayaon gayud, niining hapon. Ginapasalamatan namo Ikaw tungod sa maanindot nga awit nga bag-ohay lang giawit niining buutan nga Cristohanong babaye; ug tungod sa pagkunsad sa Imong Espiritu, ug sa interpretasyon niini. Ginoo, itugot nga mamaingon gyud kini, nagaampo kami. Ug, Dios, nagaampo ako nga panalanginan Mo unta ang matag usa kanamo, ug hinaut nga mapuno sa kalipay ang among mga kasingkasing pagmakita namo nga nahitabo kini.

³ Minahal nga Dios, ginaampo namo, niining hapon, kung aduna ma'y pipila dinhi nga dili pa andam nga makigtambo Kanimo, hinaut nga mao na kini ang takna nga himoon nila kanang kaulahiang desisyon ug mosulod na Kanimo, pinaagi sa bag-ong Pagkahimugso. Itugot kini.

⁴ Panalangini kaming tanan, Ginoo, nga dugay na nga panahon nga anaa sa pagpanaw. Ginaampo namo nga Imo kaming tudloan og bag-ong mga butang pinaagi sa Imong Pulong. Hatagi kami og mas maayo nga pagsabot pinaagi sa Imong Espiritu, Ginoo. Hinaut nga moanhi Siya ug hubaron ang Pulong. Tungod ang Espiritu lamang mao ang bugtong tighubad nga aduna kami. Ginaampo namo nga ihatag Niya kana kanamo, karong adlaw. Amo kining ginapangamuyo sa Ngalan ni Jesus. Amen.

⁵ [Usa ka igsoong babaye ang nagasugod sa pagpropesiya. Blangko nga bahin sa teyp—Ed.] Igo na kana. Pagkaanindot nga panahon! Wala na ako'y hingsayran pa nga unsa man nga mas maayong dapit nga mapahimutangan, gawas nga maanaa sa Langit, tungod nabati nato mismo Kini nga pagdihog karon, kita n'yo, nga nagalingkod na kita sa Langitnong mga dapit diha kang Cristo Jesus, og nagkatigum sa Langitnong mga dapit.

⁶ Ang Dios magapanalangin kang Igsoong babayeng Florence! Ug nakasinati siya karon og panahon sa kagul-anan, ug mga pagsubo; tungod nga bag-ohay lang namatay ang iyang amahan. Ug ako—nagaampo ako, “Dios, panalangini kini nga anak.”

⁷ Ug si Igsoong Demos, nga dala ang kabug-aton diha sa iyang duha ka abaga, ug ang responsibilidad sa tanan niining mga konbensyon ug mga ingon niana. Gikinahanglan niya ang atong mga pag-ampo, usab. Ang Dios magapanalangin kang Igsoong Shakarian!

⁸ Igsoong Carl Williams, malipayon gayud ako nga maania dinhi niini nga konbensyon uban kanimo, og sa taliwala niining tanan nga maayong mga kaigsoonan. Ug nagkaaduna pud ko og pribilihiyo nga mahimamat ang uban pa. Ug karon mao na kini ang akong panghinapos nga bahin sa buluhaton, sa nahibaloan ko, mao nga, bueno, nagalaum ako nga malamano ko unta ang uban pa niining maayo nga mga kalalaken-an, ug—ug mahimamat sila, tungod nagalaum gyud ako nga makauban sila sa Eternidad, didto sa—didto sa usa ka mas maayo nga Yuta.

⁹ Gamay nga—nga butang lang, nanghinaut ko nga dili unta ako ingon nga dili-masabtan. Ug dili kini salagma lang, wala ko naghunahuna nga ingon-ana, kay ako—nagatoo ko nga gitugot kini sa Dios, kagahapon man gud gihatagan ko og regalo sa usa ka higala dinhi, sa akong higala, nga si Danny Henry. Siya kadtong lalaki. . . Usa niana ka adlaw, sa konbensyon sa Christian Business Men didto sa California, nagpahigayon ako og—og panagtigum. Namulong ako kaniadto nga mabagison batok sa—sa kahintang sa atong panahon.

¹⁰ Ug ako—nagalaum ko nga masabtan unta sa tanan nga, walay kadautan sa akong kasingkasing. Dili ingon niana. Dili. Masabtan unta ninyo nga wala ko ginatuyo nga mamaingon niana. Apan kinahanglan ko lang isulti kung unsa ma’y nagaabot kanako para igasulti.

¹¹ Ug dayon human niadto, kining maong lalaki, nga igsoong Baptist. . . Ug sa hunahuna ko mora’g paryente siya sa usa ka artista. Ug miduol siya aron agbayan ako, og miingon, “Panalanginan ka sa Ginoo, Igsoong Branham. Gusto ko lang mohalad og usa ka pag-ampo.” Ug misugod na siya sa pagsulti og Pranses nga pinulongan. Ug ang maong lalaki wala man unta’y nahibaloan ni usa ka pulong nga Pranses.

¹² Ug adunay mitindog, nga medyo dakuon nga babaye. Nga taga. . . nagatoo ko nga siya’y taga Louisiana. Ingon niya, “Pranses kana.”

Dayon aduna pud og usa ka lalaki didto, miingon, “Pranses gyud kana.”

¹³ Ug gisulat nila kung unsa kadto. Ania kanako ang orihinal nga kopya niini. Ug niadtong tungora usab, nahitabo nga, dunay usa ka batan-ong lalaki nga miduol gikan sa luyo, ug miduol siya sa atubangan, nga gustong makita ang ilang mga sinulat. Ug siya mao ang maghuhubad sa Pranses sa U.N. “Eksakto gayud nga Pranses.”

¹⁴ Ug gusto kong basahon kining maong sinulat. Mao kini ang orihinal nga sinulat sa usa kanila, ug gikan kini niadtong lalaki nga naghubad. Tingali’g dili ko masulti nga husto ang iyang ngalan. Si Le Doux, Victor Le Doux, siya’y bug-os nga usa ka Pranses. Karon, ania ang mensahe.

Tungod kay gipili mo ang mahiktin nga dalan, ang mas lisod nga dalan, milakaw ka sa kaugalingon mong pagpili, gipili mo ang husto ug tukma nga desisyon, ug mao kini ang Akong Dalan. Tungod niining mahinungdanon nga desisyon, nagahulat kanimo ang daku nga bahin sa Langit. Daw sa unsa ka mahimayaong pagdesisyon ang gihimo mo! Kini, mismo, mao ang magahatag, ug magpahitabo, sa daku kaayong kadaugan diha sa Balaanong Gugma.

15 Sa pagdawat ko niini. . . Abi ninyo, sa unang pagkadungog ko sa mga tawo nga nanagsulti og laing mga pinulongan, ako—wala ko’y unsa man nga gikasaway, kita n’yo, tungod kay nakita ko man kini nga tinuod. Pero, kanunay pud kong nagahunahuna. Apan sa pagkahitabo niadto, ug ingon nga hingsayran ko na kung unsa ang sugo, luyo niini, ako—nasayod ako nga nagagikan kini sa Dios.

16 Dayon, ang igsoon ni Victor nga ania dinhi, usa—usa ka ilado kaayo nga abogado, gihatag niya kanako ang usa ka regalo nga gikan kang Danny. Bag-ohay lang niadto nagbakasyon si Danny sa Holy Land. Ug mihigda siya ibabaw sa lubnganan, didto sa lubnganan, diay, kon diin gipahimutang si Jesus human sa Iyang pagkamatay kaniadto. Ug sa paghigda ni Danny didto, ingon siya nga nahunahunaan kono ko niya. Ug—ug gikunsaran siya sa Espiritu sa Ginoo, ug miadto siya didto sa Bukid sa Kalbaryo kon diin nahitabo ang paglansang, ug mikuha siya og usa ka bahin sa bato. Ug mibalik siya ug gihimoan ako og usa ka pares nga hemelo gikan niadto. Ug gihatagan ko gayud kini og dakung bili.

17 Ug karon, bahin niini, siyempre, wala gyud mahibalo niini si Danny. Apan, kaganinang buntag, samtang nag-ampo ako, gitan-aw ko ang maong mga hemelo, ug ang matag usa niadto, kung inyong mamatikdan, duna kadto’y mansa sa dugo, ug usab adunay tul-id nga badlis sa matag usa mismo niadto. Ug dinhi sa mensahe nga gikan sa Dios nga iyang gisulat, mahitungod sa tul-id, og mahiktin nga dalan. Daw sa unsa nga mitukma gayud kini, sa ingon ka eksakto! Nahunahuna ko nga medyo may kahilambigitan gyud kadtong panghitabo o. . . Ug gipasalamat ko gayud si Danny. Sultihi siya, igsoon, nga nagpasalamat gayud ko niana. Ug ang talag- . . . Ang usa pa ka talagsaong butang, gipangutana ko ang akong asawa niadtong buntag nga nagsul-ob ko og sinina, nga kinahanglan gamitan og hemelo, ug ingon niya, “Nalimtan baya nako og dala ang imong mga hemelo,” busa aduna na’y gitagana ang Ginoo para kanako.

18 Oh, pagkamahimayaon niini nga kinabuhi! Dili ba, mga igsoon? Ang magkinabuhi mismo diha sa kayano sa—sa Ebanghelyo! Ug bisan, sa kayano Niini, mao Kini ang pinakahalangdon nga butang nga akong nasayran. Nasayod ko nga wala na’y unsa man nga sama Niini. Ug gihimo ra Kini nga

yano, aron nga magkaaduna ako og kahigayonan nga makasulod Niini, usab, kita n'yo, pinaagi sa grasya sa Dios.

¹⁹ Karon, niining hapon, dili ako mogahin og dakung oras, tungod nga nasayod ko nga motambong pa kamo sa mga kasimbahanan unyang gabii. Siguro, kamong tanan nga mga bisita kinahanglan n'yong motan-aw dinhi sa entablado, tanawon kining mga ministro, ug sila'y, oh, malipay gyud sila nga makauban kamo sa ilang buluhaton unyang gabii. May mahimo sila nga maayo kaninyo. Mao nga walay pagduhaduha mitambong kamo og Sunday school kaganinang buntag dinhi sa lungsod. Ug samtang nagapahigayon kita niini nga mga panagtigum, ug ingon nga sanga sa Full Gospel Business Men, nagatoo ko nga angay natong ihatag ang atong bug-os nga suporta nga mahatag nato sa atong mga kaiglesiahan, tungod kay dinha man nagaanha ang atong mga negosyante. Ug, usab, balay mismo kana sa Dios, ug nagalaum ko nga motambong kamo sa kung asa man nga iglesia unyang gabii.

²⁰ Ugma sa gabii na diay ang pagtapos sa panagtigum, sa nasayran ko, ug naipahibalo na man nila siguro kung kinsa ang mamumulong. Mao nga, gitinguha ko nga makaanhi gyud, kon itugot sa Ginoo, aron makapaminaw pud sa iyang mensahe.

Ang Dios magapanalangin sa matag usa kaninyo.

²¹ Bueno, ako, wala ko ginapangandak nga usa ako ka magwawali. Ako'y—ako'y medyo... tungod wala gani ako'y igong edukasyon para tawgon ang akong kaugalingon ingon nga usa ka magwawali. Pag ipahayag mo man gud nga, magwawali ka, nan magdahum dayon sila nga aduna ka og pipila ka mga digri sa kolehiyo. Ug—ug wala gani ko'y unsa man niana gawas *Nining* gamay'ng lamboyog. Kita n'yo? Gapaningkamot ako nga moanhi alang sa karnerong nagmasakiton, kung mahimo ko, aron ipahibalik sila ngadto sa sibsibanan sa Amahan.

²² Kung masayup man ako, nan pasayloa n'yo ako. Dili ako usa ka teologo. Dili ko usab ginasaway ang mga teologo. Ang teolo-... Okey ra man ang teolohiya. Ngani gikinahanglan nato kana. Apan usahay ginasaway ko ang kahimtang nga atong nahimutangan. Wala kana nagapahinungod ni kinsa man nga indibiduwal. Ang Mensahe gayud Kini. Ako—gustohon ko man nga dili ako ang mopahayag Niini. Mora gyud ko og wataswaton, tungod kabalo ka mismo kung unsay imong bation para sa kaugalingon mong mga anak. Kita n'yo? Dili ba dili mo unta gusto nga kasab-an ang imong bata, badlongon, o ingon niana, bisan pa man? Usa ako ka gikinananan, usab, ug nasayod ko kung unsay epekto niana kanim. Ug ako—nagasalig ko nga pasayloon n'yo unta ako.

²³ Ug gusto ko nga buhaton ninyo ang ingon niini. Samtang ania kamo nga nagalingkod, niining hapon, mohangyo ko kaninyo og pabor. Aduna lang man ko'y hamubo, og pipila

ka mga sinulat dinhi. Sama sa gikasulti ko na kaninyo, nga kinahanglan ko nang himoon kini nga, isulat ko ang mga Kasulatan. Kaniadto, masaulo ko pa ang halos tibuok Biblia, apan dili na karon. Daghan na kaayong malisud nga mga pagpakiggubat ang akong naagihan, og tigulang na usab ako para niana. Apan nagasalig ko nga—nga maminaw unta mo kanako sa makadiyut, niining hapon, ug ablihi lang ninyo ang inyong kasingkasing ug tinguhaa n'yo nga masabtan kung unsay akong ginapasabot. Dayon nagatoo ko nga mas maayo kini, ilabina sa mga pastor sa lungsod ug sa nagkalainlaing mga dapit. Ako—nagasalig ko nga maminaw kamo og ayo.

²⁴ Ug karon buhata n'yo ang ingon niini, buhata n'yo ang sama sa ginabuhat ko pag nagakaon ako og paborito kong pie, nga cherry. Usa usab sa akong paborito nga karne, ang manok. Apan pag nagakaon ako og usa ka hiwa sa lamian nga cherry pie ug nakausap ko og liso, dili man nako undangan og kaon ang pie. Iluwa ko lang ang liso, ug padayon nga kaonon ang maong pie. Kita n'yo? Pag nakausap pud ko og bukog sa manok; dili man nako ilabay ang manok. Kondili ilabay ko lang ang bukog.

²⁵ Busa, kung aduna man ko'y isulti nga dili ninyo mauyonan, sa unsa mang orasa? Ilabay lang ninyo kana nga bahin. Ug, apan, tan-awa ninyo usá kana og ayo, siguradoha ninyo nga bukog gyud kana, ha. Kita n'yo? Ug usab buut kong isulti, kung Binhi man kini, hinumdumi, nga nagapatungha Kini og bag-ong Kinabuhi. Busa susiha gyud ninyo og ayo, ug hinaut nga magapanalangin ang Ginoo.

²⁶ Adunay gisulti si Igsoong Carl Williams niadtong miaging gabii mahitungod sa pagpahigayon, og pag-ampo alang sa mga may sakit, nga maayo gayud unta. Nasayod ko nga maayo kana. Apan igo lang kita . . . wala man gud 'ta nag-andam para niana dinhi, nga magpahigayon og linya sa pagpaampo. Ug wala pud ko kabalo kung si Igsoong Oral, o si kinsa man sa uban nga mga kaigsoonang lalaki kon nagapahigayon ba sila og linya sa pagpaampo sa mga konbensyon o wala. Wala ko kabalo. Gisulayan ko na kana, duha o makatulo ka higayon. Apan, kasagaran, kung ingon na niini ang kadaghan sa tawo, kinahanglan mo man gud nga manghatag usá og mga prayer kard, kita n'yo, para mapahigayon kana. Tungod, dili gyud mahimo. Dili man gud kini usa ka arena. Balay kini sa Dios. Kita n'yo? Gikahalad kini nga ingon niana. Ug kita . . . Magkadasok ug magkatinukloranay na ang mga tawo. Pero pag adunay mga kard, ipalinya mo lang sila, nga ingon ka hapsay.

²⁷ Busa gipangutana ako ni Billy, miingon, “Buhaton ko na ba nga manghatag og mga kard? Nangayo na man gud ang mga tawo sa ako og mga prayer kard.”

²⁸ Ingon ko, “Dili sá, Billy. Pasagdan lang nato ang Balaang Espiritu nga buhaton kung unsa ma'y gusto Niyang pagabuhaton.” Kita n'yo? Pinaagi niana, kita n'yo, ug tingali'g

pasagdan ra Siya nga lig-onon ang inyong pagtoo, ug mamaayo ra kamo dinha mismo sa kon asa kamo. Kita n'yo? Apan ang... Kita n'yo?

²⁹ Pero ang Balaanong pagpang-ayo usa ra man ka gamay nga bahin diha sa Ebanghelyo. Ug dili mo puedeng himoon nga medyor ang minor. Nasayod niana ang si kinsa man. Apan kini... Usa ra kini ka paon nga gigamit aron danihon ang mga tawo nga motoo sa supernatural nga Presensiya, o sa Dios, nga anaa mismo ang Supernatural. Ug dayon, pinaagi niana, kung maila nila ang Iyang Presensiya, nan mangaayo gyud sila, kita n'yo, pinaagi sa pagtoo, nga ginatoohan Kini.

³⁰ Karon gusto kong mobasa og pipila gikan sa Pulong sa Dios, sa Bag-ong Tugon. Ug pagkahuman gusto kong mokuha og teksto gikan niining Bag-ong Tugon, ug niining Kasulatan, ug mamulong karong hapon mahitungod sa usa ka hilisgotanan sulod sa—sa hamubo lang nga oras. Ug dili ko gusto nga langanon kamo pag-ayo tungod duna pa baya'y mga buluhaton unyang gabii. Apan timan-i, nanghinaut ko nga naiklaro ko na ang akong kaugalingon. Hatagi lang ninyo kini og pagtagad sa makadiyut, kung mahimo.

Karon, sa dili pa nato buhaton kini, iduko sá nato ang atong mga ulo pag-usab.

³¹ Abi ninyo, mahimong makaawit kita og sobra. Mahimong makasinggit kita og sobra, hangtud nga mapagaw kita. Ug mahimong makaawit kita sa dili tukmang higayon, o makasinggit 'ta sa dili tukmang higayon. Apan ania ang usa ka butang, nga dili gayud kita mawala sa kahan-ayan pag nagaampo kita. “Ginatinguha ko nga ang mga tawo manag-ampo sa tanang dapit, nga managbayaw sa mga kamot nga balaan, nga walay pagpanuko.” O...

³² Amahan, mao kini ang pinakadakung pribilihiyo nga maangkon sa usa ka mortal, ang ipiyong ang iyang mga mata ug ablihan ang iyang kasingkasing, ug makigsulti Kanimo. Ug nasayod kami nga nagapaminaw Ka, kung toohan lang namo nga nagapaminaw gyud Ka. Kay miingon man si Jesus, “Kung mangayo kamo sa Amahan og bisan unsa sa Akong Ngalan, igahatag kini.” Aduna kana'y mga kondisyon, kung dili namo kana pagaduhaduhaan. Busa, Amahan, tabangi kami nga motoo, niining hapon, nga ang among mga hangyo igahatag. Ug hinaut nga wala na gayu'y pagduhaduha, sa bisan asa. Kondili hinaut nga mamahitabo, ang mga butang nga among ginapangamuyo. Ug kana'y, Dios, alang sa Imong halangdong Ngalan nga mapasidunggan karong adlaw, pinaagi sa pagdala ngadto sa Imong Ginghamian ang matag nawala ug nahisalaag nga kalag nga mapailalum sa singgit sa among tingog, o sa madangatan niining maong teyp, didto sa mga paganong kayutaan, og kon asa man kini magakaylap sa tibuk kalibutan.

³³ Ginaampo ko, Langitnong Amahan, nga wala na unta’y usa ka tawong maluyahon sa among taliwala karon. Pag matapos na ang buluhaton, hinaut nga luwason sa Ginoong Dios ang matag nahisalaag nga kalag, ug ayohon ang matag masakitong lawas, ug pagapun-on og kalipay ang kasingkasing sa Iyang mga anak. Mao kana kon nganong aduna kami’y pagtoo, Ginoo, nga mangayo sa Ngalan ni Jesus, sa Dios nga among Amahan, tungod kay nagsaad man Siya nga magapaminaw Siya. Ug kini’y alang sa Iyang kahimayaan. Amen.

³⁴ Diha sa Maayong Balita ni San Juan, sa ika-17 nga kapitulo, ug magsugod sa ika-20 nga bersekulo, gusto ko nga mobasa para sa usa—usa ka teksto. Nagatoo ko nga husto kana.

Ako nagaampo dili lamang alang kanila ra, kondili alang usab sa mga motoo kanako pinaagi sa ilang mga pulong;

Aron . . .

³⁵ Mora’g nasayup gyud ko sa bahin nga akong ginabasa. Bueno, pasayloa ko sa makadiyut lang. Ginapangita ko ang pagampo ni Jesus nga . . . O, dili diay, ang pagampo ni Jesus, kondili ang Iyang . . . Tingali’g aduna lang ko’y sayup nga namarkahan dinhi sa akong teksto. Mao man unta kini nga nagampo si Jesus nga . . . o miingon nga maingon sa usa ka babaye nga nagaantus sa paghimugso sa iyang anak, sa paghimugso, sa pagpanganak.

³⁶ Sa Lucas ba kana o sa Juan? Jack, asa gani kana? [Adunay nagaingon, “Juan 16.”—Ed.] Ika-16 sa Juan. Abi ko og husto kini, pero dili man kini parehas kon paminawon. Sa ika-16 sa Juan. [“Ika-21 nga bersekulo.”] Ika-21 nga bersekulo. Oo, ika-21 diay nga bersekulo. Oo. Ania na kita. Juan, San Juan 16:21.

Aron sila . . . mamahimo nga . . .

³⁷ Dili, Igsoong Jack, sayup man gihapon. [Adunay nagaingon, “Sulayi ang Juan, bersekulo 21.” Nagaingon ang usa pa, “21.” Nagaingon na pud ang usa pa, “ika-21 nga bersekulo sa 16.” Aduna na usab og nagaingon, “16.”—Ed.] Kini’y baynte- . . . 16:21. Nakita ko na ang ika-16 nga kapitulo sa San Juan, ika-21 nga bersekulo. Apan kini . . . Sayup ba ko? [Nagaingon ang usa ka igsoong lalaki, “Inig bati sa usa ka babaye, mao kana.”]

[Giklaro ni Igsoong Branham ang pagdikit sa mga panid niini nga Biblia diha sa teyp nga, *Karong Adlaw Natuman Kining Kasulatan* 65-0219—Ed.]

³⁸ Bueno, aduna gyu’y wamaplastar sa niining . . . kalibog niini nga Biblia. Oo, sir. [Nagaingon ang usa ka igsoong lalaki, “Sila—sayup ang ilang pag-imprinta niana.”—Ed.] Sayup gyud ang ilang pag-imprinta niini. Oo, sir. Kabalo ba mo kung unsa? Mao gyud kini ang tinuod. Usa kini ka bag-o nga Biblia. Bag-ohay ko lang kining nadawat. Ug kini adunay—kini aduna na’y . . . Sayup lang ang pagka-imprinta niini.

³⁹ [Si Katolikong Arsobispo John S. Stanley ang nagtunol sa iyang Biblia ngadto kang Igsoong Branham, ug miingon, “Pag—pag—kalma lang. Adunay katuyoan nganong nahitabo kini, ug nasayod ka niini, ug adunay ipakita ang Dios kanimo aron tabangan ka gikan niini, og kahibulongan kini.”—Ed.] Okey. [“Ania gamita lang usá ang akong Biblia, Igsoong Branham.”] Salamat. Salamat, kaayo. 16:21. Salamat, kaayo. Tinuod kana.

Ang usa ka babaye inig . . .

Sa pagkatinuod, sa pagkatinuod, magaingon ako kaninyo, nga kamo managkatulog, managpanghilak ug managbakho, apan ang kalibutan magakalipay: ug kamo masinakit, . . . ang inyong kasakit mahimo nga kalipay.

Ang usa ka babaye inig—inig bati niya may kasakit, kay nahiabot na man ang iyang takna: apan sa diha nga kahimugsoan na siya sa bata, dili na niya mahinumduman ang . . . kasakit—kasakit, tungod sa kalipay nga nahimugso sa kalibutan ang usa ka bata.

⁴⁰ Salamat, kaayo, igsoon ko. Ginapasalamatan ko gayud kana.

⁴¹ Bueno, usa gayud kini ka sayup nga pag—imprinta sa Biblia; basin nasayup ra pagbutang ang maong panid. Tungod bag—ohay ko pa man kining nabasa sa akong karaang Scofield nga Biblia, ug ang bag—o man ang akong gidala ug mianhi dinhi nga dala—dala kini, kaganina, tungod kay hinatag man kini sa akong asawa ingon nga regalo para sa Pasko.

⁴² Karon, gusto ko nga—nga maghisgot niining hapon mahitungod sa usa ka hilisgotanan nga ako nang naipahibalo ang: *Mga Kasakit Sa Pagpanganak*. Bueno, medyo dili kini maayong paminawon, apan sumala kini sa Biblia.

⁴³ Nagatoo ko nga naghigot si Jesus dinhi, sumala sa Iyang gisulti, “Magkaaduna kamo og kasakit, apan ang inyong kasakit mamahimo nga kalipay,” nagpakigsulti ngadto sa Iyang mga tinun—an kaniadto, ingon nga nanghibalo nga taliabot na ang pagtungha sa—sa Cristianismo. Ug ang daan kinahanglan nga mamatay, aron nga mahimugso ang bag—o. Ang unsa man nga nagapanganak, magkaaduna gyud og mga kasakit sa pag—antus. Ug sila siguradong moagi gyud sa kasakit sa pag—antus ug pag—agulo, sa paglabang nila gikan sa kasugoan ngadto sa grasya.

⁴⁴ Ang normal, og natural nga pagkahimugso nagatipo sa espirituwal nga Pagkahimugso. Ang tanang butang sa natural mga tipo sa espirituwal. Ug makita nato, kung atong tan—awon dinhi sa—sa yuta, ug atong makita ang usa ka kahoy nga anaa sa yuta, nga nagatubo, nagapanglimbasug kini nga mabuhi. Nagapakita lang nga aduna gyu’y usa ka kahoy, sa kung asa man, nga wala nagakamatay, tungod kay kining ania dinhi—nagatuaw man kini para sa usa ka butang.

⁴⁵ Makita usab nato ang mga tawo, bisan unsa pa ka tigulang, unsa pa ka masakiton, og kung unsa man ang ilang kahimtang, nagapaninguha gyud sila, nga mabuhi, tungod kay nagapakita kana nga aduna gayu’y usa ka dapit kon diin didto magkinabuhi, mabuhi nga hangtud sa kahangturan. Matikdi kung unsa kini ka hingpit.

⁴⁶ Karon, diha sa Unang Juan 5:7, nagatoo ko nga mao kana, kung wala ko masayup, miingon Kini, “Adunay tulo nga nagapamatuod sa Langit: ang Amahan, ang Pulong, ug ang Espiritu Santo; kining tulo Usa ra. Adunay tulo nga nagapamatuod sa yuta, kana mao ang tubig, Dugo, ug Espiritu, ug nagakahiusa kini.” Karon matikdi. Ang unang tulo *sila’y* Usa ra. Ang ikaduhang tulo yutan-on, og sila *nagakahiusa*. Dili mo mahimong maangkon ang Amahan nga wala ang Anak; dili mo usab mahimong maangkon ang Anak nga wala ang Espiritu Santo. Apan mahimo mong maangkon ang tubig nga wala ang Dugo, ug maangkon ang Dugo nga wala ang Espiritu.

⁴⁷ Nagatoo ko nga, sa nangaging mga kapanahonan, napamatud-an na kini nga tinuod; ang tubig, Dugo, Espiritu; pagpamatarung, pagpabalaan, og ang bautismo sa Balaang Espiritu. Nagakatipo kana, o nagahimo sa . . . o, kaha usa ka anti-tipo, nga nagapahinungod sa natural nga pagkahimugso.

⁴⁸ Matikdi n’yo pag ang usa—usa ka babaye o unsa man nga nagabati og kasakit, tungod sa paghimugso. Ang unang butang nga mahitabo, diha sa usa ka normal nga pagpanganak, mao ang pagbugwak sa tubig; ang ikaduhang butang mao ang dugo; ug dayon motungha na ang kinabuhi. Tubig, dugo, espiritu; ug mao kana ang nagalangkob sa normal, og natural nga pagpanganak.

⁴⁹ Ug ingon niana usab sa espirituhanon nga kahimtang. Ang tubig ingon nga; pagpamatarung pinaagi og pagtoo, nga toohan ang Dios, nga ginadawat Siya ingon nga imong personal nga Manluluwas, ug mabautismohan. Ikaduha, mao ang pagpabalaan sa espiritu, ingon nga ginalimpyohan sa Dios ang espiritu gikan sa tanang mga elemento nga iya sa kalibutan, ug sa tinguha nga iya sa kalibutan. Ug dayon mosulod na ang Balaang Espiritu ug magahatag og bag-ong Pagkahimugso ug pagapun-on kanang gibalaan nga sudlanan.

⁵⁰ Pananglitan, sama niini. Karon, kining, akong gisulti kaninyo. Kung unsa ma’y dili ninyo matoohan, ipadaplin lang, dayon kaona gihapon ang pie. Himatikdi. Karon, kon mahulog ang usa—usa ka baso diha sa nataran sa mga manok. Dili man nimo kana basta na lang puniton ug ibutang sa inyong lamesa ug sudlan dayon kana og tubig o gatas. Dili. Ang pagpunit niana, mao ang pagpamatarung. Ang paglimpyo niana, mao ang pagpabalaan, tungod kay ang Griyegong pulong nga *pagbalaan* usa kini ka pulong nga may duha ka, kahulogan nga “gilimpyohan, ug gigahin alang sa pag-alagad.” Dili nga *diha* na sa pag-alagad; kondili *alang* sa pag-alagad. Dayon pag

imo na kanang sudlan, nan ginapahimutang mo na kana sa pagpangalagad.

⁵¹ Pasayloa ko niini ha, dili ingon nga magpasakit. Pero dinha kamong mga Pilgrim Holiness, og mga Nazarene nagakapakyas nga magkinabuhi paingon sa Pentecostes. Gilimpyohan na kamo pinaagi og pagpabalaan; apan sa dihang naiandam na unta kamo nga ipahimutang alang sa pag-alagad, pinaagi sa mga gasa sa pagsulti og laing mga pinulongan ug ubang mga butang, inyo kining gisalikway, og namalik hinoon kamo pag-usab diha sa tangkal. Kita n'yo? Karon, kana'y—mao kana ang nagakahitabo. Kanunay na kanang ingon niana.

⁵² Karon, dili ingon nga mangsaway ko kaninyo ha, apan ako—gusto ko lang nga maipagawas kini gikan sa akong kasingkasing. Ug tungod nagadilaab kini sa kinasuloran ko sukad nga nakaanhi ako dinhi, busa mas maayo nga ipagawas ko na kini. Ug, tungod sa maayong kabubut-on ni Carl, ug nila ni Demos, ug ninyong tanan, ako—gusto ko lang kutob sa akong mahimo nga ipalingkawas ang akong kaugalingon gikan niini, kita n'yo, dayon anaa ra kini kaninyo.

Ang normal, nagakatipo sa espirituwal.

⁵³ Karon, atong mahibaloan pagkahuman, nga bug-os kining nahimugso. Sa diha nga ang bata, kasagaran . . . Bueno sa dihang mogawas na ang tubig, wala ka man kaayo'y buhaton niana. Ug sa dihang ang dugo na pud ang mogawas, wala sab ka'y buhaton gayud niana. Apan, aron masiguro nga buhi gyud ang bata, kinahanglan mo siyang pikpikon sa may sampot, ug pahilakon siya. Ug ingon-ana ang usa ka . . . Bueno, tungod sa kawalay-edukasyon, dili pareho sa akong mga kaigsoonang ministro dinhi nga mga binansay kaayo, sila, mao nga kinahanglan ko pang ipananglitan ang kinaiyahan aron itipo kini. Ug mao kana. Ingon niana ang mahitabo. Gikinahanglan usab ang tinuod nga pagpikpik, aron maipasabot kini nganha kanila.

⁵⁴ Bueno, kinahanglan mo og medyo, usa ka matang nga pagpakurat. Tingali'g, dili mo na kinahanglan nga pikpikon siya sa may sampot, kondili pakuratan lang siya og diyutay. Usahay, ang pinaka ideya para masayran nga buhi gyud ang bata, mao nga ginabuhat ang ingon-ana. Hawiran siya, og uyogon siya. Kon wala pa siya nagaginhawa, mao nga medyo pikpikon siya sa may sampot, ug pagkahuman niana mohilak na siya, sa dili-mailhan nga mga pinulongan, siya mismo, sa tan-aw ko. Apan, siya—siya, bisan pa man, nagahilak na gyud siya.

⁵⁵ Ug sa tan-aw ko kung ang usa ka bata man gud nga nahimugso og patay na kana nga—nga gipanganak, nga walay paghilak, wala man la'y emosyon, nan patay na kana nga bata.

⁵⁶ Ingon niana usab ang nagakahitabo sa iglesia karong panahona, sa sistema; duna kita'y daghan kaayong mga bata nga patay na nga gipanganak. Husto kana. Nagkinahanglan sila

og usa ka pagbunal sa Maayong Balita, nakita n'yo, ug aron pukawon sila, aron mapukaw sila mismo, og aron nga mahuyop sa Dios ang gininhawa sa Kinabuhi ngadto kanila. Ug karon nahibaloan nato nga tinuod gayud kana. Salikwaut man kini nga teolohiya, apan Kamatuoran kini, bisan pa man.

⁵⁷ Busa, matikdi n'yo, sa paggitib sa usa ka binhi, kinahanglan uná nga mamatay ang daan nga binhi sa dili pa man mahimong mogitib ang bag-ong binhi. Ug, busa, malisud gyud ang kamatayon, sa bisan unsa nga higayon. Ug, masakit kaayo kini. Malisud kaayo kini. Mao ra usab sa pagpanganak, tungod kay nagahatud man ka og kinabuhi ngadto sa kalibutan, ug kana'y—masakit sab kaayo kana.

⁵⁸ Miingon si Jesus nga ang Iyang Pulong usa ka Binhi nga ang usa ka magpupugas miadto aron magpugas. Bueno, nasayod na kitang tanan niana. Ug gusto kong magtudlo bahin niini ingon nga usa ka leksyon pang-Sunday school, tungod Dominggo man karon. Matikdi, dayon, kining Pulong, ingon nga usa ka Binhi. Apan, timan-i n'yo, ang—ang binhi magapagula lamang og bag-ong kinabuhi pag matun-as na kini.

⁵⁹ Ug mao kana'y hinungdan nga malisud kaayo alang niadtong mga Fariseo kaniadto nga masabtan ang atong Ginoong Jesus Cristo, tungod kay napailalum pa man sila sa kasugoan. Ug ang kasugoan mao ang Pulong sa Dios diha sa binhi nga porma. Apan sa diha nga nahimo nang unod ang Pulong, ug nahimong, dili na ingon nga kasugoan, kondili grasya na. Bueno, ang grasya ug ang kasugoan dili mahimo nga magdumala sa mao rang higayon. Tungod kay, ang grasya ingon gayud ka labaw pa kay sa kasugoan, wala gani og kahilambigitan ang kasugoan. Ug busa malisud kaayo kaniadto alang sa mga Fariseo nga mamatay sa ila mismong kasugoan, aron nga mahimugso unta ang grasya. Apan gikinahanglan nga mahitabo kadto. Tungod dili man mahimong magkaadunay duha ka kasugoan sa mao rang higayon.

⁶⁰ Dili mahimong adunay usa ka balaod nga nagaingon nga kinahanglan sundon mo ang sinyas sa semaphore, ug nagaingon ang laing usa nga puede ra nga dili mo sundon ang sinyas niini; nagaingon ang usa nga kinahanglan mong sundon, nagaingon pud ang usa nga puede ra nga dili sundon. Kini, kinahanglan nga usa ra ka balaod sa usa ra ka higayon. Tingali'g usa ka higayon puede lang nga diretso kang molahus; nga may gamay'ng pagbantay, pero puede molahus. Apan sa higayon nga nakapula kini. Hunong gyud! Kita n'yo? Ug mao nga dili mahimong magkaaduna og duha ka kasugoan sa mao rang higayon.

⁶¹ Karon, namatikdan nato nga sa kanunay... Ang akong hunahuna karon para kaninyo, nagkinahanglan gyud og kasakit, kagul-anan, og kalisud. Tan-awa n'yo kung unsa nga nangamatay kaniadto ang mga Fariseo sa maong kasugoan, nga

miagi sa kasakit, kagul-anan, og kalisud. Apan gikinahanglan kadto nga mahitabo.

⁶² Karon, hingsayran nato nga ang ulan nga nagadala og bunga sa yuta, “Nahimugso kini,” maingon sa gisulti sa magbabalak, “diha sa mga kaumahan sa dalugdog, sa gabonon, og dag-umon nga kawanangan.” Apan kung wala kita’y dalugdog ug gabonon, dag-umon nga kawanangan, og inalisngaw nga tinulo sa ulan nga naggikan sa kadagatan ug inalisngaw gikan sa asin, nan dili kini mahimugso. Ngani gikinahanglan ang kilat, ang mga pagdahunog sa dalugdog; ang gansangon, makusog, og makahahadlok nga butang, aron mahimugso ang mabugnaw nga mga tinulo sa tubig. Magkinahanglan gayud og kasakit aron mapahigayon ang pagpanganak. Magkinahanglan pud og pagkamatay. Ug sa diha nga nagakawala ang mga panganod, nagakahimugso pud ang ulan, tungod kay ang ulan kabahin man sa panganod. Kinahanglan nga mahanaw ang usa aron nga mabuhi ang laing usa.

⁶³ Karon, ug ang mga kaigsoonan ko nga ania dinhi, ang uban kanila may kasarang, mahimo nilang itudlo ang tanang mga balaod mahitungod nianang mga butanga. Pero dili ako makahimo.

⁶⁴ Bueno modangat kita sa usa na usab ka butang, para sa usa pa ka diyutay’ng kapanghimatuoran. Sa hunahuna ko ang usa sa pinakamatahum nga mga bulak. . . Ang tanan aduna ma’y kaugalingon nilang mga ideya bahin niana. Apan nagatoo ko nga ang pinakamatahum nga bulak nga akong nakita sukad-sukad, mao kanang anaa sa sidlakan, ang atong lirio sa lim-aw. Pila man ang nakakita na og usa ka lirio sa lim-aw? Oh, para kanako, wala gayu’y unsa man nga sama niana. Apan namatikdan ba ninyo kung unsay gikinahanglan aron mamahimong ingon niana ang lirio sa lim-aw? Mahunahunaan ko ang gisulti ni Jesus, “Palandunga ninyo ang mga lirio, kung giunsa niini pagpangabudlay ug pagkalinyas, apan nagaingon ako kaninyo, nga, si Solomon sa tibuok niyang himaya wala makabisti nga sama sa usa niini.” Kay, ang himaya ni Solomon ug ang iyang pagpangbisti ang tanan niadto artipisyal ra man. Apan ang lirio, sa katahum niini, mao ang kinabuhi mismo niini nga mao’y nagapahimo niini nga matahum, og dili ang kung unsang artipisyal nga pangtabon, og pangpintal.

⁶⁵ Sama lang sa atong mga kababayen-an, sa hunahuna ko dili man ninyo kinahanglan nga magpabutang niining mga berde, kabalo na mo, ug nianang artipisyal nga mga pilok sa mata, kabalo na mo, nga sama niana, ug tanan nianang pagpakolor sa mga kuko o—o unsa man kana, nalibog na ko nianang mga butanga, kanang tanan na nga ginadayan-dayan n’yo sa inyong nawong, aron mahimo kamong mga maanyag. Adunay paagi sa pagpatahum. Kung inyo lang unta idugang ang Mga Buhat 2:4, og isagol kana, sa Juan 3:16, siguradong malabwan gyud niana

ang unsa man nga mga pagpaanyag nga iya sa Max Factor. Kita n'yo? Mas higugmaon pa gyud kamo sa inyong bana; sa tanang uban pa; ug sigurado ako nga higugmaon usab kamo sa Dios.

⁶⁶ “Ang lirio,” ingon ni Jesus, “palandunga ninyo kini, kung giunsa niini pagtubo, og pagpangabudlay, aron ipagitib ang kaugalingon niini.” Kining gamay’ng lirio, tan-awa n’yo kon diin kini nagagikan; sa hugaw, pita, lapuk, lapukon nga katubigan, mahugaw nga katubigan. Nagalusot kini gikan nianang tanan, kining gamay’ng binhi sa kinabuhi, nga nagapangabudlay gikan diha sa ilalum sa lim-aw kon diin anaa usab ang mga baki ug—ug mga ingon niana, ug dayon ginapagitib ang kaugalingon niini gikan nianang tanan. Apan sa diha nga mabulad kini sa presensiya sa adlaw, mahimugso na kini. Ang gamay’ng binhi magagitib na ngadto sa kinabuhi. Pero dili kini mahimong mogitib hangtud dili uná kini moagi sa tanang proseso. Kinahanglan nga moagi gyud kini niana. Mao kana ang nakapahimo niini nga mamaingon niana, tungod kay ang adlaw man mismo mao’y nagasidlak niini para mogitib. Ug sa dihang bug-os na kining mapahimutang ibabaw sa tanang mahugaw nga katubigan, ug lapuk, ug uban pa, nan malipayon kaayo kini, og igahatag mismo niini ang iyang kaugalingon nga walay bayad. Ug pagkatahum niini nga kinabuhi pag mabulad kini sa presensiya nga mao’y nagapatubo niini.

⁶⁷ Sa hunahuna ko usa kana ka matahum nga tipo sa kinabuhing Cristohanon. Sa diha nga, may Butang nga nagapahigawas kanimo gikan sa kalibutan, hangtud usa ka adlaw matawo ka na mismo tungod sa presensiya Niini, pinaagi sa Balaang Espiritu. Pagkaanindot gayud! Pag sulayan mo gani nga tabangan kini, mapatay mo lang kini.

⁶⁸ Sama ra sa usa ka gamay’ng piso sa diha nga mapusa kini, kabalo na mo, kung nakamatikod kamo og usa sa nianang gagmay’ng mga piso, ginagamit niini mismo ang tumoy sa iyang gamay’ng sungo aron mapusa kini, o bisan unsa man nga langgam nga mapusa gikan sa pagka-itlog. Kini—kini’y kinahanglan. . . Nagakahamtong kini, sa sulod nianang kabhang. Mao nga ang mga bahin nga anaa sulod sa itlog kinahanglan pud nga—nga matun-as. Ug gikinahanglan niining gamiton ang iyang gamay’ng sungo, ug manusik-tusik hangtud nga mabuak ang kabhang. Pagbuslot sa kabhang pagawas, ang tawag namo niana, didto sa Kentucky kon diin ako gikan. Ginabuslotan sa maong piso ang kabhang aron makagawas. Wala gayud sila’y hingsayran og unsa man nga mas maayong paagi. Kita n’yo? Kita n’yo? Ngano man? Tungod mao ra man kana ang gikatagana nga paagi sa Dios. Kon sulayan nimo nga tabangan siya, nan mapatay mo lang siya. Kon buslotan pud nimo ang iyang kabhang, mamatay gayud siya. Kita n’yo? Kinahanglan man niyang manglimbasug, mangabudlay, aron makagawas.

⁶⁹ Ingon niana usab ang angay'ng pagabuhaton sa usa ka Cristohanon. Dili nga lamanohon ka lang ni kinsa man, og pasudlon ka na. Kondili kinahanglan mo gayud nga magpabilin dinha hangtud nga mamatay ka, madugta, ug matawo pasulod ngadto sa Ginghamarian sa Dios. Mao kana ang gikatagana nga paagi sa Dios. Dili ka makasulod pinaagi sa pagpalista, o pagpakiglamano, ug pagpamiyembro, pagpagarbo, og pagpaningkamot. Ang kinahanglan ninyong—ninyong buhaton nga mogawas lang gikan nianang kabhang. Matikdi n'yo, wala na'y unsa man nga mas maayong paagi nga ilang nakaplagan.

⁷⁰ Wala gayud sila'y hingsayran nga mas maayong paagi para sa usa ka masuso nga maangkon kung unsa ma'y gusto niini gawas sa paagi sa Dios. Bueno, sa diha nga mahimugso ang bata, mahimong magbutang ka og bagtinganan dinha tupad sa iyang gamay'ng kuna, og moingon, "Anak ko, usa—usa baya ka pang-teologo ang akong pamaagi. Ngani nakabasa na ko og mga libro mahitungod sa kung unsay paagi sa pagpadaku og usa ka masuso. Ug, sultihan ta ka, nga usa ikaw ka moderno nga bata. Natawo ka sa usa ka modernong panimalay, sa usa ka modernong ginikanan. Pag gutomon ka na, o kinahanglanon mo ang imong mama o kaha ako, bagtinga lang kining gamay'ng bagtinganan." Dili gyud kana magsilbi. Tungod ang bugtong paagi aron maangkon sa bata kung unsa ma'y gusto niini, mao lang ang paghilak para niana. Mao kana ang paagi sa Dios.

⁷¹ Ug mao usab kana ang paagi aron maangkon nato ang atong ginatinguha, mao ang pagtuaw alang niini. Pagtuaw lang. Ayaw pagkaulaw. Isulti n'yong, "Nagakauhaw ako sa Dios." Ayaw panumbalinga ang mga diyakono, mga pastor, o kinsa man ang anaa sa palibot, pagtuaw, bisan pa man. Anaa man ang mga Jones nga nagalingkod dinha; unsa ma'y kalahian niana? Pagtuaw gayud, tungod mao lang kana ang bugtong paagi nga maangkon mo kini, og nga matabangan ka. Gitudlo Niya kana kaniadtong ania pa Siya sa yuta, kabalo na man mo, mahitungod sa dili-matarung nga maghuhukom.

⁷² Ang usa ka gamay'ng yamog, wala ko kabalo sa pormula niana. Tingali'g adunay siyentipikanhong pagtuki bahin sa . . . isulti ko lang kini sa paagi nga nahunahunaan ko. Tingali'g usa ra kana ka matang sa nagkatipun-og nga mga gas nga nagtipontipon sa mangitngit nga gabii, ug nagakahulog kana sa yuta. Ug pagmahulog kana, mahimugso na pud kana inig ka gabii. Apan inig ka buntag, anaa ra kana dinha, nga mabugnaw, ug napatlaag, dinha sa gamay'ng dahon sa balili, o kaha anaa diha sa inyong hayhayan og mga sinina. Apan sa dihadiha nga mosidlak na ang adlaw, namatikdan ba ninyo kung unsa kana ka malipayon? Nagakidlap kana ug nagapatlaag. Ngano man? Nasayod man kana nga ang kahayag sa adlaw mao'y magapabalik niana ngadto sa kon asa kini napahimutang sa sinugdan.

⁷³ Ug mao usab ang matag lalaki o babaye nga natawo sa Espiritu sa Dios. Aduna gyu'y butang bahin niini, sa diha nga madan-agan kita sa Kahayag, malipay gayud kita, tungod kay nasayod man 'ta nga magabalik na kita sa kon asa kita gikan, gikan sa sabakan sa Dios.

⁷⁴ Magasidlak kini tungod sa kalipay, sa diha nga maigo kini sa adlaw, siyempre, sa pagkahibalo nga magabalik ra kini sa kon asa kini gikan.

⁷⁵ Medyo salikwaut nga mga butang, og puede ra pud ta nga magpadayon niini, apan hibaloon pa nato ang ubang butang.

⁷⁶ Nasayod kita nga ang daan nga binhi, kinahanglan, sa dili pa mahimong mogitib ang bag-ong binhi gikan sa daan nga binhi, kini kinahanglan uná nga madugta, gayud. Dili nga mamatay, lang, kondili madugta usab human nga mamatay kini. Nasayod kita nga tinuod kana.

⁷⁷ Mao sab gihapon sa bag-ong Pagkahimugso. Dili na kita nagabalik, kondili nagapadayon na mismo sa dihang matawo na kita pag-usab. Ug mao kana kon nganong nagtoo ako, nga sa karong panahon, aduna kita'y (ingon ka daghan) dili diay, ingon ka daghan nga, mga matuod nga bag-ong Pagkahimugso, tungod kay ang binhi, tingali'g, mouyon man sila sa Pulong o sa tawo, apan ayaw man nila nga madugta gikan sa daang sistema nga ilang nahimutangan. Ayaw nilang manggawas gikan niana. Gusto ra nilang magpabilin nianang daan nga sistema, ug nagaangkon og bag-ong Pagkahimugso, o nagatoo kono sa Mensahe sa kapanahonan. Makaplagaan nato ang ingon niana ilalum sa panahon ni Luther, ni Wesley, sa mga Pentecostal, ug sa tanang uban pa nga mga kapanahonan. Gapaninguha gihapon sila nga manghawid sa daang sistema, ug usab nagaangkon Niini. Busa ang panahon sa daang sistema kinahanglan gyud nga mamatay, madugta, aron nga mahimugso ang bag-o. Pero gusto man nila nga manghawid gihapon niana.

⁷⁸ Matikdi. Nasayod man sila nga patay na ang daang sistema, apan dili lang gyud nila gusto nga madugta gikan niana. Bueno, ang pagkadugta, mao'y sa diha nga mawala na gayud kana. Pag ang usa ka . . . Gihimo ang usa ka *pahayag*, nga sila kono'y mga bag-ong Nahimugso, apan ang maong *pahayag* usa lang man ka hinimo nga timailhan. Ang *pagkadugta*, mao gyud ang nagapatungha og bag-ong Pagkahimugso. Mao nga gikinahanglan uná nga madugta gikan niana, maingon sa nahitabo sa tanang kapanahonan, gikan sa Wesleyan, ug tanang uban pa.

⁷⁹ Apan, ang punto niini nga, human sa pagkadugta, motungha na ang bag-ong Pagkahimugso. Si Wesley o . . . mitungha si Luther kaniadto nga dala-dala ang unang pulong, "Mabuhi ang matarung pinaagi sa pagtoo." Bueno, dili na man siya puede

nga manghawid pa sa daang sistema. Mao nga gikinahanglan mogawas na siya gikan niadto.

⁸⁰ Ug tungod nga gidala kaniadto sa mga Calvinista ang iglesiang Anglican sa ingon niadto nga kahimtang, ilalum sa doktrinang Calvinista, mao nga nagpatungha ang Dios og usa ka doktrinang Arminian, nga iya ni John Wesley. Ang daang sistema kinahanglan nga mamatay, aron nga motungha ang bag-o.

⁸¹ Ug sa natapos na ang kapanahonan ni Wesley, ug ang tanang gagmay'ng mga kapanahonan, o mga dahon nga migitib gikan sa lindog, o sa uhay, sa panahon ni Wesley. . . Kita n'yo, sa diha nga miabot ang Pentecostes nga dala-dala ang pagpasig-uli sa mga gasa, kinahanglan na nila kaniadto nga mogawas gikan sa Baptist, sa Presbyterian, sa Pilgrim Holiness, sa mga Nazarene, sa Church of Christ (kono), ug sa tanan niadto. Gikinahanglan nila nga mogawas gikan niadto, og madugta gikan niadto, aron nga madawat ang bag-ong Pagkahimugso.

⁸² Mao nga gibansagan kamo nga mga buang-buang sa una pa. Apan sama sa gikaingon ni Pablo sa dihang nadugta na siya gikan sa iyang gipamahayag kaniadto. Miingon, "Sa dalan nga gitawag og laing-tinoohan, sa ingon nagasimba ako sa Dios sa atong mga ginikanan." Sa dalan nga gitawag og laing-tinoohan! Kita n'yo? Gidawat niya ang bag-ong Kinabuhi, ingon nga Gihimugso sa Daang Tugon ang Bag-o, ug kinahanglan pud niya nga madugta gikan sa Daan ug gihimo na lang kadto nga usa ka landong. Aron nga mamahimong . . .

⁸³ Dinha mismo kita sa pagka-karon. Bueno, pasensyahi n'yo ako. Apan mao kana ang akong ideya. Ang mga kaiglesihan nahimo na gyud nga ingon ka sistematiko hangtud nga dili ka na puedeng makatambong ngadto sa usa ka iglesia kon dili ka man miyembro nianang usa. Kinahanglan mo uná nga magkaaduna og fellowship kard, o kung unsa nga matang sa pagpa-ila. Ug tungod niini nga tinoohan, ang bugtong pultahan nga abli pa gihapon para kanako mao kining sa Business Men. Ug basta dili lang sila usa ka organisasyon, mahimo ra kong makig-uban kanila, bisan pa man, ug aron maihatud ko ang Mensahe, para sa mga tawo, nga nabati kong anaa sa akong kasingkasing. Apan nahimo man kining ingon na gyud ka sistematiko. Ug gihigugma ko kamong mga Pentecostal. Pero ang pentecostes dili man organisasyon, bisan pa man. Ginatawag n'yo lang ang inyong kaugalingon nga ingon-ana. Ang pentecostes usa ka kasinatian ug dili nga usa ka denominasyon.

⁸⁴ Apan, nakita n'yo, ang problema man gud niini, nga malisud kaayo para sa mga tawo. Sa diha nga makita nila Kini ug toohan Kini, ug makita Kini nga gipaila gayud sa Dios, diha sa Pulong, apan bisan pa niana, malisud kaayo kaninyo nga madugta gikan nianang butang nga inyong nahimutangan. "Unsa ma'y akong buhaton? Asa na man ko mokuha og akong makaon?"

⁸⁵ Unsa? Ang Dios man ang inyong kalan-on. Ang Dios mismo mao ang angay n'yong hawiran. “Unaha ninyo pagpangita ang Ginghamarian sa Dios, ug ang Iyang pagkamatarung.” Mao gayud kana. Kabalo na mo kung unsay akong ginahisgotan.

⁸⁶ Gikasultihan kita sa mga propeta sa Dios nga magkaaduna kita og usa ka bag-ong yuta, usa ka bag-ong Langit ug bag-ong yuta. Kung gusto n'yo og Kasulatan bahin niini, anaa kini sa Pinadayag 21. Pero mahimo ko ra nga isulti kini para kaninyo, aduna man ako niini dinhi. Miingon si Juan, “Nakita ko ang usa ka bag-ong Langit ug ang usa ka bag-ong yuta: kay ang unang langit ug ang unang yuta nangahanaw na man.” Nahananaw kini. Bueno, kung magkaaduna man kita og usa ka bag-ong yuta, nan dili mahimo nga magkaaduna og daang yuta ug bag-ong yuta sa mao rang higayon. O, dili mahimo nga magkaaduna og bag-ong kalibutan ug daang kalibutan sa mao rang higayon. Dili gyud mahimong magkaaduna og duha ka kahan-ayan sa kalibutan nga magkadungan sa mao rang higayon. Bueno, aron nga magkaaduna og bag-ong yuta, nan kinahanglan uná nga matun-as ang daan. Karon, kung kinahanglan uná nga mamatay ang daan, nan magahatag gyud kana og mga kasakit sa pagpanganak para sa bag-o.

⁸⁷ Ug dayon kung eksaminon sa doktor ang usa ka pasyente nga nagabati na og kasakit sa pagpanganak, ingon nga . . . usa sa mga butang nga pagabuhaton sa doktor. Ngani, nagasulti ako sa atubangan sa duha o tulo, nga akong nailhan, nga mga maayong doktor sa medisina nga ania dinhi, Cristohanong mga doktor. Ug ako—ako—gipangutana ko kamo bahin niini. Usa sa mga unang butang nga ginabuhat sa doktor, human nga iyang obserbahan ang pasyente, orasan niya ang gidugayon sa mga pagsakit, mga kasakit sa pagpanganak. Ginaorasan niya ang gidugayon sa mga pagsakit, kung unsa ka duol ang mga niini, ug kung unsa ka grabe ang matag pagsakit. Tungod ang usa ka pagsakit man gud mas mograbe pa kana kay sa usa pa. Ang sunod, mas nagakasakit pa gyud, og mas nagasige-sige na. Ingon niana ang pagsusi niya sa maong kahimtang, pinaagi sa mga kasakit sa pagpanganak.

⁸⁸ Bueno, kung ang kalibutan kinahanglang maghimugso og usa ka bag-ong kalibutan, susihon usá nato ang pipila ka mga kasakit sa pagpanganak nga masinati sa kalibutan, ug dayon atong tan-awon kung unsa nga adlaw ug kung unsa ka dugay ang iyang kasakit sa paghimugso.

⁸⁹ Ang Nahaunang Gubat Pang-kalibutan kaniadto nagpakita og grabe nga mga kasakit sa pagpanganak. Nagpakita kadto sa usa sa mga unang kasakit sa pagpanganak ingon nga moagi man siya og pagbati. Tungod niadtong panahona para kaniya, naggama kita og mga bomba, ug aduna kita'y mga machine gun, ug hilo nga gas. Ug mahinumduman man ninyo. Tingali'g daghan pud kaninyo ang dili na makahinumdum. Usa pa lang ako ka batang lalaki kaniadto nga mga otso anyos ang panuigon,

apan akong mahinumduman nga nagahisgot sila mahitungod niining mustard ug chlorine gas, ug uban pa. “Daw sa unsa nga pag ipangsabwag na kini ug,” ingon nila, “pagasunogon gyud niini ang tibuok kalibutan. Mahimong patyon niini ang tanan-tanan. Bueno, mahimong usa—usa—usa ra kini ka pagsugod, nga pagapaliron ra kini sa hangin sa tibuok yuta.” Ug daw sa unsa nga halos mamatay sa kahadlok ang tanang tawo tungod niadtong dakung hinagiban nga poison gas! Ngani nasinati na sa kalibutan, ang unang mga kasakit niini sa pagpanganak.

⁹⁰ Ug hingsayran pud nato, nga nagkaaduna kita og ikaduhang gubat, Gubat Pang-kalibutan, ug ang iyang mga kasakit mas naggrabe pa gyud. Nagkagrabe sa matag higayon, ang maong mga kasakit sa pagpanganak sa kalibutan. Hapit na gani siyang mahanaw, tungod kaniadtong panahon sa bomba atomika, tungod mahimo man niini gun-ubon ang usa ka tibuok siyudad. Mas grabe pa kadto kay sa mga kasakit sa Nahaunang Gubat Pang-kalibutan, kung hisgotan ang pagkaguba sa kalibutan.

⁹¹ Bueno, nasayod ang kalibutan nga haduol na ang iyang panahon sa paghimugso. Mao kana’y hinungdan nga nakulbaan na kaayo siya, nagakahingawa, maingon sa kung unsa siya sa karon, tungod nga aduna ma’y bombang hydrogen, ug mga missile sa kawanangan nga mahimong mopuo sa tibuok kalibutan. Ang usa ka nasud mahadlok na sa ubang nasud, bisan unsa pa kana ka gamay’ng nasud. Tungod aduna na man kini og mga missile nga ginapamahayag nila nga igo mismo kono’ng. . . Ang tagsa-tagsa kanila. Mahimo gani nila nga kontrolon ang mga niini pinaagi sa mga bitoon ug ihulog ang mga niini sa bisan asa man sa kalibutan kon gustohon nila.

⁹² Ngani ang Rusya, sumala sa akong nadungog sa balita, niadtong miaging adlaw, ginapamahayag niya nga mahimo kono niyang gun-obon kini nga nasud, ug—ug pugngan ang mga atom o mga ingon-anang butang nga moguba sa iyang nasud. Wala kita masayod kung unsay pagabuhaton bahin niana. Ang matag nasud nagapamahayag man gud og mga ingon niini, ug mamaingon gyud kana.

⁹³ Ang siyensiya nga iya sa tawo misulod na ngadto sa dakung laboratoryo sa Dios, hangtud nga sila na mismo ang magapatay sa ilang mga kaugalingon. Ginatugotan ra sa Dios, kanunay Niyang ginatugotan ang kaalam para madaut ang tawo. Pero wala gayu’y unsa mang butang nga ginadaut ang Dios. Ang tawo mismo ang nagalaglag sa iyang kaugalingon tungod sa kaalam, sama sa gibuhad niya sa sinugdan kaniadto, nga mas gidawat ang kaalam ni Satanas imbis ang Pulong sa Dios.

Bueno, nasayod siya nga magun-ob na gayud siya. Dili na man niya maagwanta pa ang kasakit.

⁹⁴ Ang Rusya, sa tan-aw ko, pagagun-obon gyud niya kining nasura karon, tungod nagdahum siya nga mahimo ra niya

kining gun-obon, ug dayon mapanalipdan ra niya ang iyang kaugalingon. Mahimo man kana sa bisan kinsa nianang gagmay'ng mga nasud. Apan, nangahadlok lang sila, tungod kay nasayod man sila nga kining kalibutana dili na gyud makapabilin sa orbit niini ilalum sa ingon niana nga mga kahintang.

⁹⁵ Busa, nasayod ang kalibutan nga hilabihan gayud ang iyang mga kasakit sa pagpanganak, og siguradong magun-ob na siya. Haduol nang, mahimugso, ang usa ka bag-ong pagkahimugso. Mapasalamaton ako tungod niana. Gikapoy na man gud ko niining ania sa karon. Ang si kinsa man. . . nasayod ang si kinsa man nga—nga ania dinhi sa karon ang dapit sa kamatayon ug kagul-anan, ug tanan nang matang sa mga kasukwahian, ug uban pa. Malipayon ako nga kinahanglan na niyang magun-ob, ug malipayon ako tungod haduol na kana nga panahon. Sama sa giingon ni Juan, kaniadto, “Hinaut unta, umanhi Ka na, Ginoong Jesus.”

⁹⁶ Bueno, kinahanglan niya uná nga madugta, siyempre, sa ako nang gikaingon, aron nga maghinungdan og bag-ong pagkahimugso. Tan-awa kung unsa na siya ka daut. Matikdi n'yo, mga kaigsoonan ko! Siya'y bug-os na nga daut. Ang iyang pamulitika ug mga sistema ingon na gayud kini ka daut na. Wala na gani ni usa ka lig-on nga bukog diha kaniya, ang iyang mga sistema sa kalibutan, ang iyang pulitika ug ang iyang pang-relihiyon nga pamulitika, ug unsa man kana. Moingon ang usa, “Usa ako ka Democrat. Usa ako ka Republican. Methodist ako. Baptist ako.” Aba, ang tibuok butang dunot na gyud hangtud sa kinasuloran niini. Siguradong aduna gayu'y magun-ob. Dili na siya magdugay pa. Bisan pa kung magpahimutang kamo og usa ka George Washington o usa ka Abraham Lincoln sa matag probinsya niining Estados Unidos, dili gihapon kini makabalik. Tungod lagpas na man kini sa katubsan.

⁹⁷ Adunay usa na lamang ka butang nga makatabang kaniya, mao kana ang Pag-abot sa Magbubuhat. Amen.

⁹⁸ Hingsayran na niya nga magun-ob gayud siya. Ginabati na niya ang kasakit ug pag-antus. Ngani ang tawo wala na masayod kung unsay pagabuhaton. Ang usa nagatan-aw nga paingon *niini*, ug ang usa pud nagatan-aw nga paingon *niana*, ug unsa na lang. Ang usa nagakahadlok ngadto sa usa pa. Ang usa gapaninguha sa pagbuhat og usa ka butang nga magapukan *niining* usa pa. *Kining* usa gapaningkamot pud nga supakon *kanang* usa, og gub-on ang usa pa. Hangtud nga, naitunol na nila kini karon diha sa mga kamot sa mga tawong makasasala, nga mahimong puohon ang tibuok kalibutan sulod ra sa lima ka minuto. Kita n'yo? Busa nasayod siya nga dili na niya kana mapugngan. Nasayod ang mga tawo nga dili gyud niya kana mapugngan. Ug nasayod pud ang kalibutan nga paingon na sila niana, og mahitabo gyud kana.

⁹⁹ Kay, mao man kana ang giingon sa Dios. “Ang tibuok kalangitan ug ang yuta magakalayo.” Mamahimo kana ingon nga usa ka pag-usab sa kinatibuk-ang butang, aron nga mahimugso ang bag-ong kalibutan. Gipropesiya na kana sa Dios.

¹⁰⁰ Siya’y daut na, diha sa tanan niyang mga sistema, ug kinahanglan niya nga mamaingon niana, aron nga madugta.

¹⁰¹ Mao kana kon ngano nga siya, sa gikaingon ko, ginerbiyos na siya pag-ayo ug namula na ang nawong, ug naglibog na. Ug dunay mga linog, sa bisan asa, ug sa tibuok kabaybayonan. Ug dagku kaayo ang mga balod didto sa Alaska, nga nagakalukot sa tibuok kabaybayonan, tungod sa mga linog ug mga ingon niana. Ug ang mga tawo nanagpadala na og sulat, “Angay na ba kaming mobiya dinhi? Angay na ba kaming mobiya dinhi?” Kita n’yo? Wala na sila masayod kung unsay pagabuhaton. Tungod nga wala na ma’y luwas nga dapit gawas sa Usa ra, nga mao si Cristo, ang Anak sa buhi nga Dios. Ug adunay usa lamang ka butang ingon nga luwas nga dapit, ug mao kana si Cristo. Ang tanan nga anaa sa gawas Niana mangalaglag gayud, sa ingon ka sigurado nga giingon sa Dios.

¹⁰² Karon atong tan-awon ang Basahon sa Doktor, kung ang kalibutan anaa na ba gyud sa ingon niini nga kahimtang, ug atong hibalong kung kini kinahanglan ba nga magakahitabo sa diha nga mahimugso na ang bag-ong yuta. Mateo 24, diha sa Basahon sa Doktor, nga mao ang Biblia, ug atong tan-awon kung unsa ba ang gipropesiya na, og kung unsay mamahimo niyang mga timailhan.

¹⁰³ Karon, kung nasayod ang usa ka doktor sa mga timailhan mahitungod sa pagkahimugso sa usa ka bata. . . Ug sa higayon nga motungha na ang bata, naandam na sa doktor ang tanan-tanan, tungod kay nasayod man siya nga mao na kana ang—ang oras nga mahimugso na ang bata. Tungod kay, ang tanang mga timailhan makita na; ingon nga—nga migawas na ang tubig, og ang dugo. Ug karon ang. . . Oras na kana. Pag mius-os na gani ang bata, nan oras na kana para mahimugso na gyud ang maong bata. Ug mao nga ginaandam sa doktor ang tanan-tanan para niana.

¹⁰⁴ Bueno, gisultihan usab kita ni Jesus sa eksakto kung unsay mahitabo niining panahona mismo. Gisultihan Niya kita, diha sa Mateo 24, nga ang Iglesia, tinuod nga Iglesia, ug ang usa pa ka iglesia, mamahimong. . . Ang iglesiang natural, og ang Iglesiang espirituwal, “Halos magkapareho na gayud, tungod sa mga pagsundog-sundog, hangtud nga malimbongan niini ang mismong mga Pinili, kon mahimo pa.” Maingon gayud sa nahitabo kaniadto sa mga adlaw ni Noe, “Kon unsa nga nanagpangaon sila, nanag-inom, nanagpangasawa, nanagpamana,” ug tanan na niining imoralidad sa kalibutan nga atong makita sa karong panahon. Ang Biblia, ang Basahon, ang Basahon sa Doktor nagsulti na nga mahitabo gyud kini. Busa, sa

dihang makita nato nga nagakahitabo na kini, nan nasayod na kita nga haduol na ang paghimugso. Siguradong mamahitabo kini. Oo, sir. Karon, ginatan-aw nato kana, ingon—ingon nga nasud; dili diay ingon nga usa ka nasud, kondili ingon nga usa ka kalibutan.

¹⁰⁵ Bueno, ang Israel, ang iglesia, balikan sá nato siya sa pipila ka minuto. Ug subayon nato siya sulod sa sunod nga diyes minutos, siguro. Ang Israel kaniadto nakasinati pud og mga kasakit sa pagpanganak ilalum sa matag propeta nga miabot sa yuta. Nakasinati siya og mga kasakit sa pagpanganak tungod sa Mensahe sa propeta. Unsa diay gibuhat niini? Atua man sa maong propeta ang Pulong. Ug—ug nagpugas man ang Israel og hilabihan nga kadautan ug naghimo og ingon ka daghang sistematikong mga sugo sa iyang pagkinabuhi, hangtud nga gitay-og siya niining propeta gikan sa iyang gibarugan. Mao nga gikadumtan ang mga propeta sa tanang tawo. Ug, busa, sa diha nga magpadala ang Dios og propeta, ang iglesia mismo moagi gyud sa mga kasakit sa pagpanganak. Tungod kay, ang propeta, “Ang Pulong sa Ginoo nagaabot man ngadto sa propeta, ug kaniya lamang.” Mao nga, ang Pulong nga gilitok alang nianang panahona gikapadayag ra pinaagi sa propeta niana nga kapanahonan, og ingon na niana sa una pa. Ug, ang mga iglesia, tungod nagahimo man sila og daghang mga sistema palibot sa Pulong, mao nga ginauyog siya sa propeta gikan sa iyang pagduyan-duyan pag-abot sa propeta. Makasinati gyud siya og mga kasakit sa pagpanganak.

¹⁰⁶ Unsa man kana? Pagpahibalik ngadto sa Pulong! Ang pagpahibalik ngadto sa Kinabuhi! Ang mga sistema wala ma’y Kinabuhi. Ang Pulong sa Dios lang ang dunay Kinabuhi. Ang mga sistema nga gihimo-himo sa palibot Niini, wala gyu’y Kinabuhi. Tungod ang Pulong ra man ang nagahatag og Kinabuhi. Ang iyang Mensahe mao’y nagauyog sa mga nahabilin aron mapahibalik sila ngadto sa Pulong. Aduna ma’y gamay’ng pundok nga mogawas ug motoo. Usahay, tingali’g. . . Ngani sa panahon ni Noe kaniadto, dunay mga walo lamang ka tawo. Apan, bisan pa man, giuyog gyud sa Dios ang mga nahabilin. Ug, gilaglag, giuyog pahilayo ang tanang uban pa.

¹⁰⁷ Ingon niana ang nahitabo, sa tanang nangaging mga kapanahonan, hangtud nga sa katapusan naghimugso ang iglesia para kanila og usa ka Batang Lalaki, ug kana nga Batang Lalaki mao ang Pulong, Mismo, nga nahimong unod. “Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo ipon kanato.” Gibuntog Niya ang matag yawa, ang matag gahum sa yuta, nga nagpakigbatok Kaniya, pinaagi lamang sa Pulong sa Amahan. Sa matag pagsulay nga gitanyag Kaniya ni Satanas, Iyang gibadlong si Satanas; dili nga pinaagi sa Iyang—Iyang Kaugalingong mga gahum nga anaa Kaniya,

kondili pinaagi sa Pulong sa Dios. “Kini nahisulat na . . . Kini nahisulat na . . . Kini nahisulat na . . .” Kay Siya man mao ang Pulong.

¹⁰⁸ Kaniadtong gisulong ni Satanang si Eva, dili man Pulong ang maong babaye, mao nga nahulog kadto. Sa dihang gisulong pud niya si Moises, mao gihapon ang nahitabo. Apan sa diha nga naatubang niya ang Anak sa Dios, napulo ka libo man ang boltahe Niini. Nangatangtang gayud ang mga balhibo ni Satanang, sa diha nga mitubag ang Anak sa Dios ug miingon, “Nahisulat na, ‘Ang tawo mabuhi dili sa tinapay lamang, kondili sa matag Pulong nga nagagula sa baba sa Dios.’” Mao kadtong Batang Lalaki, nga nahimong unod. Ang Eternal nga Pulong sa Dios, Mismo, nga napadayag diha sa lawas nga unod dinhi ibabaw sa yuta, aron ipadayag ang Pulong.

¹⁰⁹ Sa ingon nianang paagi Niya nahibaloan kung unsay anaa sa ilang mga kasingkasing kaniadto. Sa ingon nianang paagi Niya nasulti kang Felipe kon diin kini, og kon si kinsa kini. Gisultihan pud Niya si Simon Pedro kon si kinsa kini. Iyang gisultihan usab ang maong babaye nga atua sa may atabay. Ngano man? Siya man mao ang Pulong. Oo. Miingon ang Biblia, diha sa Mga Hebreohanon sa ika-4 nga kapitulo, “Ang Pulong sa Dios labi pang mahait, mas gamhanan kay sa espada nga duhay-sulab, nga nagadulot bisan sa kinauyokan sa bukog, ug usa ka Magtutugkad sa mga hunahuna ug sa mga katuyoan sa kasingkasing.”

¹¹⁰ Ang hinungdan, nga wala hik-it niadtong mga Fariseo nga mao na diay Kadto ang Pulong nga nahimong unod, tungod kay nahilambigit na sila og ayo sa pagka-sacerdote ug sa usa ka sistema. Ug mao nga kinahanglan papason ang daang sistema. Mao kadto ang Pulong, busa kung unsa ma’y gikasaad na natuman gayud. Ug kung natuman kadto, kinahanglan madugta pud kadto. Mao kadto ang tipaka. Pero ang Binhi mitubo ra.

¹¹¹ Dili puedeng dalhon ni Moises ang mensahe nga iya ni Noe. Dili usab puedeng dalhon ni Jesus ang mensahe nga iya ni Noe, tungod para man kadto sa laing kapanahonan. Ug husto man ang daang binhi, apan gituman ra niini ang katuyoan niini ug natunas ug nahanaw kini. Ang pagkausab gikan sa daan paingon sa bag-o, kon diin ang Kinabuhi, mao ang nagpasakit sa mga tawo kaniadto, mao sab gihapon ang nagapasakit kanila sa karong panahon.

¹¹² Wala kita nagatukod og pader, nga mora’g nagasugod pa lang kita sa mensahe nga iya ni Luther, nagasubay sa direktso nga linya, o sa usa ka mensaheng Pentecostal. Husto. Gapaliko na kita. Nagatukod kita og usa ka bilding. Ang Pulong sa Dios mao ang blueprint. Ang si bisan kinsa mahimo man motukod og direktso, apan magkinahanglan man og usa ka mason para ma’y moporma sa kanto. Gikinahanglan usab ang gahum sa Dios aron buhaton kana. Gikinahanglan ang usa ka dinihogan nga gikan

sa Langit, nga maipadala aron buhaton kana. Ingon na niana, sa matag kapanahonan. Ug sa panahon sa mga propeta, ang Pulong sa Ginoo nagaabot lang pinaagi niadtong mga propeta, ug sila ang nagaporma, nagahimo og kalahian. Apan ang gusto sa mga magtutukod nga magtukod og usa ka dingding. Kini dili gani usa ka pader, dili gayud, usa kini ka bilding, usa ka bilding sa Dios.

113 Karon, atong nabati ug nahibaloan nga Kini mao ang Kamatuoran, og nga daut na ang mga sistema sa matag kapanahonan. Ug ang matag usa sa ilang mga sistema gikinahanglan nga madugta ug matun-as, hangtud nga gihimugso niya kining Iglesia. Gikan sa dunot og kalamukat nga kahimtang mitungha ang Pulong, Mismo. “Ang Pulong sa Ginoo nagaabot ngadto sa mga propeta.” Wala gayud nagaabot ngadto sa mga sacerdote; kondili nagaabot Kini ngadto sa mga propeta.

114 Ug matikdi, ug sa pagtungha Niini, sa katapusan ang Pulong bug-os nga nahimugso dinhi sa tawhanong unod. Diha Kaniya napahimutang sa pagkalawas ang bug-os kinatibuk-an sa Pagka-Dios. Siya mao ang Pulong. Ang mga propeta kabahin ra sa Pulong, Pulong nga alang sa ilang kapanahonan. Kita, niining panahona, mga kabahin usab sa Pulong, ingon nga nagasunod 'ta sa Pulong. Apan Siya mao ang tibuok kahupnganan sa Pulong. Siya man mao ang Pulong. Miingon Siya . . .

115 Sa dihang gi-akusahan nila Siya kaniadto, nga kono ginahimo ang Iyang Kaugalingon nga sama sa Dios, tungod Siya'y Anak man sa Dios, giingnan nila Siya, “Bueno, ginahimo Mo ang Imong Kaugalingon nga Dios.”

116 Miingon Siya, “Dili ba nahisulat man kini sa inyong kabalaoran, nga ginatawag ninyong, ‘mga dios’, ang mga propeta kang kinsa miabot ang Pulong sa Dios? Ug sila mao gayud. Kung ingon-ana unsaon man ninyo pagkondena Kanako kon Ako moingon nga Ako ang Anak sa Dios?”

117 Tungod, diha sa Anak sa Dios napahimutang man sa pagkalawas ang bug-os kinatibuk-an sa Pagka-Dios. Siya mao ang bug-os nga kapadayagan sa Dios. Mao nga sa katapusan . . . May mga kasakit sa pagpanganak ilalum niadtong mga propeta, tungod, ingon nga sila'y Pulong, sila nagpahinungod man ngadto sa kahupnganan nilang tanan, ang kahupnganan sa Pulong. Ug dayon nangamatay ang mga sistema, hangtud nga, “Ang Pulong nahimong unod ug nagpuyo ipon kanato.”

118 Matikdi kung giunsa kini paghulagway diha kang Jacob. Matikdi kung giunsa kini paghulagway diha kang Joseph, nga ingon ka eksakto. Gihigugma sa iyang igso- . . . sa iyang amahan; pero gidumtan sa iyang igsoon, sa walay hinungdan. Siya'y espirituhanon, makapanagna og mga butang, ug makahubad siya og mga damgo. Dili niya mapugngan nga mahimong

ingon niadto. Tungod gikahimugso man siya nga ingon niadto. Siya'y gitagana-nang-daan nga mamahimong ingon niadto. Busa, gidumtan siya sa iyang mga igsoon, ug sa katapusan gibaligya siya sa katloan ka buok nga salapi, sa halos katloan ka buok. Ug gibayaw siya, gipalingkod sa tuong kamot ni Faraon. Matikdi n'yo, sulod sa iyang bilanggoan, atua didto ang usa ka magbalantay sa vino ug usa ka magbubuhat sa tinapay; ang usa nalaglag ug ang usa naluwas.

¹¹⁹ Si Jesus usab didto sa Iyang bilanggoan, sa krus; nalaglag ang usa, og naluwas ang usa. Eksakto gayud. Ug pagkahuman gibayaw na Siya ngadto sa kalangitan ug milingkod sa Trono sa Dios. Ug sa dihang mobiya na usab Siya, adunay usa ka tingog nga mobudyong, “Mangluhod mo,” ug ang tanang dila magasugid.

¹²⁰ Ug pagmobiya pud si Joseph sa trono kaniadto ug motindog, ginapatingog ang trumpeta, ug ang tanang tuhod kinahanglan nga mangluhod. “Paanhi na si Joseph.”

¹²¹ Busa, sa umaabot nga adlaw ang dakung Trumpeta sa Dios pagapatingogon, ang mga nangamatay diha kang Cristo mangabanhaw, ug ang tanang tuhod mangluhod, ug ang tanan magasugid niini nga Pulong. Apan unsa ba'y Iyang anhion? Unsa ba'y hinungdan nga moanhi Siya dinhi?

¹²² Himatikdi, gihimugso sa babaye kining bug-os nga Pulong nga nahimong unod, tungod sa mga kasakit sa pagpanganak sa mga propeta nga nanagsinggit, “Moabot na Siya! Moabot na Siya! Moabot na Siya!”

¹²³ Bueno, apan kaniadto wala man siya'y propeta sulod sa upat ka gatus ka tuig, sumala sa kasaysayan ug sa Kasulatan, gikan kang Malaquias hangtud kang Juan. Aduna lang sila kaniadto og mga teologo, mga sacerdote, og mga pastor. Karon dinhi atong mahunahuna, nga kon wala kana, daw sa unsa na tingali ka dunot ang kahimtang sa iyang sistema, sulod sa upat ka gatus ka tuig nga walay direktang Mensahe, gikan sa Dios, nga MAO KINI ANG GINAINGON SA GINOO. Busa, ang mga sacerdote, mga propeta, ug uban pa, nahidangat gayud niadtong hilabihan nga kalibog. Dunot na siya.

¹²⁴ Dayon si Juan, ang gikasaad nga Elias sa Malaquias 3, dili sa Malaquias 4. Malaquias 3, tungod kay mao man sab gihapon ang gisulti ni Jesus diha sa—sa Mateo sa ika-11 nga kapitulo.

¹²⁵ Sa dihang nagakahalap na ang matang-agila ni Juan, nagatoo ko nga gipahayag kini ni Pember sa *Mga Unang Kapanahonan*, ug miingon si Juan, “Lakaw ug pangutan-a ninyo Siya kung Siya na ba Kana, o magapaabot pa ba kami og lain.” Kita n'yo?

¹²⁶ Ug miingon Siya, si Jesus, sa diha nga Iyang gipabalik ang mga tinun-an ni Juan, human silang gisultihan nga magpabilin usá sa panagtigum ug matikdan kung unsay mahitabo. “Ug

balik kamo didto, suginli ninyo si Juan niining mga butanga. Ug bulahan kadtong dili mapangdol.”

127 Milingi Siya ug mitan-aw sa Iya mismong mga tinunan ug sa mga tawo nga Iyang gikaestorya. Miingon Siya, “Unsa man ang giadto ninyo aron tan-awon sa pag-adto ninyo kang Juan?” Miingon Siya, “Nangadto ba kamo aron makita ang usa ka tawo nga nagasul-ob og hamiling panapton?” Ug miingon Siya, “Nagaingon Ako kaninyo, ingon niana nga matang ang nagapuyo sa mga palasyo sa mga hari.” Ingon pa Siya, “Nangadto ba kamo aron makakita og usa—usa—usa ka bagakay nga ginakusokuso sa hangin?”

128 Sa laing pagkasulti, ang matag gamay’ng butang nga nagaabot, ginakusokuso niya kini? “Sultihan ta ka, kung motambong ka lang dinhi ug magpamiyembro sa among pundok, puede ka namong hatagan og mas arang-arang nga suweldo.” Dili ingon-ana si Juan. “Kung dili lang ka magwali batok sa *ingon-ini* ug *ingon-ana*, bueno, puede na ka nga magpamiyembro sa among mga grupo.” Dili gyud ingon-ana si Juan.

129 Miingon, “Kung ingon-ana unsa man ang giadto ninyo aron tan-awon, usa ba ka propeta? Ug Ako magaingon kaninyo, labaw pa gani sa usa ka propeta. Kay kung makadawat kamo niini, mao kini siya ang gihisgotan sa propeta, nga nagaingon, ‘Akong ipadala ang Akong mensahero sa atubangan Ko, aron magaandam sa dalan.’” Sumala kana sa Malaquias 3:1.

130 Dili nga Malaquias 4, dili gyud. Lahi na man sab kana. Tungod kay, sa pag-abot niana nga Elias, ang kalibutan pagasunogon na sa gilayon, ug ang mga matarung magalakaw ibabaw sa mga abo sa mga dautan.

131 Karon, matikdi. Wala gyud kaayo sila ingon nga napukaw sa iyang Mensahe gikan sa paghikatulog nila tungod sa ilang simbahan. Miingon lang sila, “Dunay usa ka buangbuang nga tawo didto. Moagi na pud siya, sa dili madugay. Ginatawag siya nga buangbuang; tungod ginasulayan man niyang lumsan ang mga tawo didto sa tubig. Kita n’yo? Aba wala gayu’y unsa man nianang tigulang nga tawo. Aba, wala man gani siya nagasul-ob sa husto nga matang sa mga bisti. Naputos ra siya og panit sa karnero. Bueno, siya’y ingon ka kabus sama ra sa pabo ni Job. Aba, unsa kaha nga seminario ang iyang gigikanan? Unsa kaha’y iyang fellowship kard? Dili gyud kami makigtimbayayong sa iyang mga panagtigum. Pasagdan lang namo siya nga magpabilin dinha nga magutman.” Kita n’yo? Wala gayud nausab ang kalibutan, ni ang mga sistema. Uh-huh. “Apan pasagdan lang namo siya nga magpabilin dinha. Wala man siya’y bisan unsang. . .”

132 Kabalo ba mo nganong wala siya’y bisan unsa? Hinumdumi, ang iyang amahan usa ka pari. Pero nganong wala man siya misunod sa buluhaton sa iyang amahan, nga nabatasan na nga

pagabuhaton sa mga anak niadtong mga panahona? Tungod kay aduna man siya’y, mas mahinungdanon nga Mensahe. Igapaila niya ang Mesias, kay ingon-ana man ang gisulti sa Balaang Espiritu. Kadtong diyutay’ng nahabilin nga gipahibalik pinaagi sa Mensahe ni Gabriel, kaniadto, nasayod usab nga mamahitabo kadto. Busa gikasulthian kita, nga kaniadtong mga nuebe anyos pa ang panuigon niya, miadto na siya sa kamingawan. Human nga namatay ang iyang amahan ug inahan, miadto na siya sa kamingawan, tungod kinahanglan man niyang magpatalinghug sa ingon ka eksakto.

¹³³ Tungod kay, sulod niadtong pang-teologo nga bilding didto, mahimong miingon sila, “Bueno, nasayod ako nga ikaw kadtong magamantala sa Mesias. Miingon man sab si Isaias nga magaabot kono ka, busa ikaw gyud kana nga tingog. Bueno, dili ba mihaum usab niana si Igsoong Jones sa ingon ka tukma?” Ug dali ra unta siya nga madani.

¹³⁴ Apan wala gyud siya nakakat-on og unsa man sa ilang mga sistema. Tungod nga mahinungdanon kaayo ang iyang Mensahe. Miadto siya ngadto sa kamingawan, aron magpuyo didto.

¹³⁵ Matikdi. Ang iyang Mensahe dili sama nianang iya sa usa ka teologo. Nagagamit siya og mga tipo. Ingon siya, “Oh, kamong mga kaliwat sa mga bitin.” Ginatawag niya kadtong mga ministro nga, “mga bitin.” Kini, usa man gud sa mga dautang butang nga iyang nakaplagan didto sa kamingawan, usa sa mga maliputong butang, mao ang mga bitin. Ug nahunahuna niya, “Mao ra gayud kini ang pinakamaayong pagtandi nga akong nasayran.” Ingon siya, “Kamong mga kaliwat sa mga bitin, kinsa ma’y nagpasidaan kaninyo sa kapungot nga umaabot? Ayaw gayud pag-ingon, ‘Miyembro kami sa *ingon-ini* ug *ingon-ana*,’ kay makahimo ang Dios sa niining mga bato sa pagpatindog og mga anak kang Abraham.” “Niining mga bato,” nga iyang nakaplagan didto sa kamingawan ug sa tampi sa sapa.

¹³⁶ “Usab ang atsa,” nga iyang gigamit didto sa kamingawan, “napataup na sa gamut sa kahoy,” nga mao’y iyang nakita sa kamingawan. “Ang matag kahoy nga wala nagapamunga og mga maayong bunga,” nasayod gyud siya kon asa niya kuhaon ang iyang pangsugnod, kita n’yo, “pagaputlon ug isalibay ngadto sa kalayo,” og ginahimo kadtong pangsugnod. Kita n’yo? Ang iyang Mensahe dili sama niadtong iya sa usa ka ministro, man lang. Nakabasi kadto mahatungod sa kinaiyahan, didto sa kamingawan.

¹³⁷ Apan aduna gayud siya’y Mensahe nga igamantala, ug aduna siya’y pagtoo sa iyang Mensahe, sa pagsulti, “Kining Mesias, nga haduol na kaayong moabot, hangtud nga ania na diay Siya mismo sa inyong taliwala karon. Ako magaingon kaninyo, adunay Usa nga nagatindog diha sa inyong taliwala, nga wala ninyo hiilhi, Kinsang mga sandalyas dili gani ako takus sa

pagbitbit. Siya magabautismo kaninyo sa Espiritu Santo ug Kalayo.”

“Si kinsa ba Siya, Juan?”

“Wala ako masayod.”

¹³⁸ Apan usa niana ka adlaw, adunay mitungha nga usa ka batan-ong Lalaki nga nagalakaw sa suba, Lalaking ordinaryo ra kon tan-awon. Sa usa lamang ka. . . Atua nagatindog didto ang tigulang nga si Juan Bautista, ang bulahang tigulang nga propeta, ug milantaw siya latas sa Jordan. Ingon siya, “Tan-awa, mao kana ang Cordero sa Dios nga magakuha sa sala sa kalibutan.”

“Giunsa mo man pagkaila Kaniya, Juan?”

¹³⁹ “Siya nga atua sa kamingawan, nga nagsugo kanako nga moadto ug mangbautismo diha sa tubig, miingon, ‘Kang Kinsa hingkit-an mo nga pagakunsaran sa Espiritu, Siya Mao ang magabautismo diha sa Espiritu Santo.’”

¹⁴⁰ Ang iyang Mensahe dili mahimong magagikan sa usa ka pang-teologong panghunahuna o kaha sa kung unsang sistema sa kredong hinimo-sa-tawo. Kini kinahanglan nga direktang magagikan sa Dios.

¹⁴¹ Tungod kay, wala man kaayo sila matay-og sa iyang Mensahe. Naghunahuna sila, “Oh, ang ingon niya nga nakita niya kono Kadto. Mao bitaw nga nagduhaduha gayud ko niana. Wala ko’y unsa man nga nakita. Mitan-aw man ko. Oh, my! Pero wala gyud ko’y unsa man nga hingkit-an mahitungod niana,” ang sulti nila ug sulti sa mga sacerdote.

¹⁴² Apan nakita gyud niya Kadto, ug hingsayran pud nato karon nga nakita niya Kadto. Oo, nakita gyud niya. Apan namatikdan ba ninyo kung unsay nadangtan niadto?

¹⁴³ Wala gayud sila napukaw niadto gikan sa ilang paghikatulog. Nagpadayon ra sila mismo, sa pagputol sa iyang ulo, bisan pa man. Tungod kadto—wala man sila napukaw niadto.

¹⁴⁴ Apan midangat mismo kadto sa mga nahabilin, sa kadtong mga aduna na’y Kinabuhi sa kinasuloran nila, sa kadtong diyutay’ng pundok, sila Ann ug—ug si Simeon, ug pipila niadtong mga nanagpaabot alang sa Pag-abot sa Ginoo. Ug si Anna, nga buta, didto sa templo, usa ka babayeng propeta nga nangalagad sa Ginoo pinaagi og mga pag-ampo. Ug dayon usa niana ka adlaw sa dihang atua siya sa Espiritu. . .

¹⁴⁵ Ug nagpropesiya pud si Simeon ug miingon, ang tigulang nga lalaki, ingon niya, “Gisultihan ako sa Espiritu Santo nga dili ako mamatay hangtud nga makita ko ang Cristo sa Ginoo.”

¹⁴⁶ Aba, ang pipila sa mga sacerdote, abi ninyo, nanag-ingon, “Makaluluoy’ng tigulang nga tawo, medyo giango-ango na gyud siya, kabalo mo. Aba, halos anaa na sa lubnganan ang usa niya

ka tiil, ug paingon na sab ang usa pa niini. Mao nga, pasagdi na lang siya. Nahimo man hinoon siyang dungganon nga tawo. Apan siya’y medyo. . .”

¹⁴⁷ Apan, nakita n’yo ba, kung unsay iyang nabatonan? Gikapadayag kadto kaniya pinaagi sa Espiritu Santo.

¹⁴⁸ Mao sab gihapon ang gikapadayag kaninyo niining hapon. Gidala kamo sa Espiritu Santo dinhi alang sa usa ka katuyoan. Sa unsa mang. . . Ang Balaang Espiritu mismo! Tan-awa n’yo kining mga pari ug mga ministro sa Methodist, Baptist, Katoliko, ug tanan na nga ania dinhi. Minandoan sila sa Espiritu Santo. Ania na ang takna. Busa gimandoan sila sa Espiritu Santo, ug nagapaabot sila Niini, og nagatinguha. Dayon, sa usa lang ka. . .

¹⁴⁹ Kaniadto, kabalo na mo, wala pa sila kaniadto og telebisyon. Salamat sa Ginoo alang niadto nga panahon.

¹⁵⁰ Busa, sila, atua sila didto sa kabakiliran sa Judaea. Adunay usa—usa ka Bata nga nahimugso didto. Dihay mitungha nga usa ka Bitoon, ug uban pa.

¹⁵¹ Ug human sa walo ka adlaw, gidala sa inahan ang maong gamay’ng Bata, nga nakaputos sa lampin. Sa pangputos nga panapton Niini. Gisultihan ako. . . gikaingon nga kadto mao’y. . . Tungod wala sila’y unsa man nga ikapasul-ob kaniadto. Mao nga usa—usa ra kadto ka diyutay’ng tinabas nga panapton gikan sa yugo sa baka, sa gikaingon kanako, mao kadto’y Iyang lampin. Ania karon si Joseph ug sila, nga nagasulod kugos-kugos kadtong gamay’ng Bata.

¹⁵² Akong mahanduraw ang ubang mga inahan nga atua didto nga nagapalayo, uban ang ilang gagmay’ng mga bata nga nakasul-ob ug ginansilyo nga mga sinina ug mga ingon niana. Miingon, “Tan-awa sila. Kita n’yo? Kita n’yo? Mao kana ang babaye. Kita n’yo? Naburosan baya siya nianang tawhana. Ania siya nagasulod na. Kaniya, pahilayo gyud mo kaniya. Ayaw pagduol.” Mao gihapon ang ginahunahuna nila sa karon.

¹⁵³ Apan, si Maria, nga nagkugos niadtong Bata, wala siya’y labot kung unsa ma’y gihunahuna nila. Tungod nasayod man siya kung kang Kinsang Anak kadto.

¹⁵⁴ Ug mao man usab ang matag magtotoo nga ginadawat ang Pulong sa Dios sa kinasuloran sa ilang kasingkasing! Dili ko igsapayan kung unsa ma’y ginaingon sa mga sistema. Nasayod mismo kamo kung unsa Kini. Usa Kini ka saad sa Dios. Gipadayag Kini kaninyo sa Espiritu Santo, sa diha nga gilandongan kamo sa Iyang Gahum. Nasayod sab kamo kon diin Kini. Wala gyu’y tawong may katungod nga magwali sa Maayong Balita gawas kung nahinagbo na niya ang Dios didto sa luyong-bahin sa disyerto sa nagadilaab nga sapinit, diin walay pang-simbahang sistema nga makahimo sa pagsaysay Niini pahilayo kaninyo. Atua kamo mismo didto. Nahitabo mismo kini kaninyo. Dili ko igsapayan kung unsay ginaingon sa mga sistema. Saksi

mismo kamo niini. Alleluyah! Gibati ko ang daw sama niadtong tigulang nga itum nga tawo nga akong gihisgotan, “Wala na ko’y igong espasyo dinhi karon.” Kita n’yo? Gibati ko ang pagkarelihiyoso gayud niining orasa, pagmahunahuna ko kana. Ug husto kana. Ang Dios, Mismo, mao’y nagpadayag kaninyo.

¹⁵⁵ Nabatonan ni Simeon ang maong saad. Sa nagalingkod siya sulod sa iyang lawak-tun-anan niadtong buntaga, oh, sa hunahuna ko tingali’g adunay pipila ka gatus nga mga bata ang ginadala sa sulod didto, kada buntag. May halos duha na ug tunga ka milyon nga mga Judio sa nasud kaniadto, ug ginadala sa sulod kadtong mga bata, ug ang daghan pa nga mahimugso. Sa matag walo ka adlaw gikinahanglan nga moadto ang inahan, aron maghalad og halad alang sa pagpapatli. Ug ania karon may nagaabot. . . atua si Simeon, nga nagalingkod didto, kabalo mo, tingali’g nagabasa siya sa basahong-linukot ni Isaias. Wala ako mahibalo. Apan sa kalit lang. . .

¹⁵⁶ Bueno, kung nagsaad ang Espiritu Santo kanimo, nan kinahanglan tumanon sa Espiritu Santo kana nga saad, kung ang Dios gayud Kini. Siya, kung Siya. . .

¹⁵⁷ Kung dunay usa ka tawong motungha ug magasulti og usa ka butang, nga wala ginapamatud-an sa Dios, nan dili kana sumala sa Kasulatan, sa sugod pa lang. Kalimti na kana. Ug kung moingon man siya nga kana mao gayud, ug wala gihapon kana ginapamatud-an sa Dios, nan sayup gyud kana bisan pa man.

¹⁵⁸ Tungod kay, ginahubad man sa Dios ang Iyang Mensahe. Siya mao ang Kaugalingon Niyang tighubad. Kon mahitabo man ang ginaingon sa maong tawo, nan moingon gyud ang Dios, “Patalinghugi n’yo siya, kay Kamatuoran kana.” Sentido komun lang kana. Kung moingon ang maong tawo nga mahitabo kana, ug nahitabo gyud kana, nan mao kana ang nagapamatuod niana. Kinahanglan nga sa tanang higayon, Kamatuoran gayud kana, tungod kay dili man nagapanghimakak ang Dios.

¹⁵⁹ Ug busa atua si Simeon nga nagalingkod didto, nga ginadawat ang pagpanglutos. Usa man siya sa mga nahibilin. Napatalinghugan niya si Juan, uban sa diyutay’ng mga nahibilin niadtong panahona. Ug atua siya nagalingkod didto, nga nagapatalinghug niadtong basahong-linukot, ingon nga nanghibalo na. Ang buut kong ipasabot, nga nanghibalo na nga moabot si Juan, tungod nga siya—kabahin man siya sa mga nahibilin. Ang Pulong gikapadayag ngadto kaniya. Ug sa kalit lang, sa diha nga napasulod na sa templo kadtong Bata, nan katungdanan kadto sa Espiritu Santo nga ipadayag nga atua na Kini didto. Busa si Simeon, ingon nga minandoan sa Espiritu, migawas siya sa lawak-tun-anan, midiretso sa pasilyo, og midangat niadtong nagalinya nga mga kababayen-an. Gisubay niya kadtong linya mismo sa mga kababayen-an hangtud nga nahidangat siya sa kon diin kadtong Bata, nga ginalikayan nilang tanan kaniadto. Gikugos niya ang Bata,

og miingon, “Ginoo, itugot na karon nga ang Imong ulipon magabiya nga malinawon, kay ang akong mga mata nakakita na man sa kaluwasan gikan Kanimo.”

¹⁶⁰ Ug niadtong tungora usab, ang usa pa sa diyutay’ng mga pinili niadtong panahona, nga mao si Anna, nga usa ka babayeng propeta. Atua siya didto, nga buta, og anaa ra sa suok. Mitindog siya, ingon nga buta. Miduol siya didto, nga gipangunahan sa Espiritu, taliwala sa tanang mga kababayen-an nga atua didto ug sa mga tawo nga nagkadasok sa sulod ug gawas sa templo, hangtud nga nakaduol siya mismo sa kon diin kadtong Bata nga Cristo.

¹⁶¹ Kung nahimo sa Espiritu Santo nga pangunahan ang usa ka buta nga babaye paingon Kaniya, unsa pa kaha ang usa ka pundok sa Pentecostal nga makakita man unta mo? Dili na ko mosaysay pa og dugang. Kabalo na man mo kaniadto pa. Matikdi. Oh, my! Siguradong napahimutang na usab ang iglesia kaniadto sa hilabihan nga kalamukat, niadtong panahona, sigurado gayud! Apan giuyog gyud niadto ang diyutay’ng mga nahibilin kaniadto, sa ako nang gikaingon.

¹⁶² Karon magmatinuuron kita. Kung makita nato kining iglesia karong panahona nga ingon na niana ang kahimtang, dili ba nahidangat pud kita nianang puntoha pag-usab? Karon tan-awa lang ninyo ang mga butang nga gisaad, sa Biblia, nga magakahitabo sa iglesia niining panahona. Makita man nato kung unsa na ang nagakahitabo sa kalibutan, ug makita usab nato nga misangko na kini sa katapusan niini. Bueno atong susihon ang iglesia.

¹⁶³ Siya, ang iglesia mismo, nakasinati na man og mga kasakit sa pagpanganak sa panahon ni Luther kaniadto. Karon, nasayod kita nga aduna ma’y pito ka mga kapanahonan sa iglesia, ug pito pud ka mensahero alang niana nga mga kapanahonan sa iglesia, sumala sa Pinadayag. Bueno, sa dihang gikinahanglan na ni Luther nga motungha kaniadto, nan siguradong nagpahinungdan kadto sa iglesia nga makasinati og kasakit sa pagpanganak, apan gihimugso man sab niadto ang usa ka Luther. Husto kana.

¹⁶⁴ Human niadto, nagkalamukat na usab kadto, mao nga nahimugso ang usa ka Wesley. Husto kana.

Nagkalamukat na usab, ug nahimugso ang Pentecostal.

¹⁶⁵ Ngani ang matag usa niadtong mga mensahero sa ilang kapanahonan, nag-uyog sa . . . para mapahibalik ang mga tawo sa Pulong, sa Mensahe sa ilang kapanahonan, sa Mensahe nga sumala sa Biblia. Aduna ko’y papagawas na, nga libro, bahin niana, ang komentaryo mahitungod sa unang upat ka kapitulo sa Pinadayag. Basaha n’yo kini, sa dihadiha nga mapa-imprinta na nato kini. Ug nagapamatuod kana, sa wala gayu’y pagduhaduha, kung unsa ang mensahe ni Luther kaniadto, nga mao ang

pagpamatarung; kung unsa ang pagpabalaan, ingon nga mao'y sunod nga proseso diha sa natural nga pagkahimugso. Ug dayon miabot ang mga pentecostal, sa ingon ka tukma.

¹⁶⁶ Karon, matikdi, giuyog sa matag kapanahonan ang iglesia ug mao'y naghatag niini og mga kasakit sa pagpanganak. Apan unsa ma'y gibuhat nila kaniadto? Human nga nasinati nila ang mga kasakit sa pagpanganak, imbis nga magpadayon sa Pulong, nanguha hinoon sila og pundok sa mga kalalaken-an nga sama ra sa gibuhat sa kadtong mga nauna. Eksakto gayud. Pagkahuman sa pagpang-uyog sa mga apostoles, nakaplagnan nato ang iglesia nga mitipas na usab. Dayon nakaplagnan pud nato, nga miabot ang daghang uban pa, sila Agabus ug daghan pa sa bantugang mga repormador sa sinugdang kaniadto. Giuyog gayud ang matag kapanahonan, sumala sa inyong natun-an na bahin niadtong panahon nga wala pa ang Nicaea Council, panahon sa mga Amahan sa Nicaea, ug tanan na kaniadto. Mabasa ninyo kanang tanan dinha. Giuyog gayud ang matag kapanahonan, sa matag higayon nga dunay mitungha nga usa ka mensahero nga dala ang MAO KINI ANG GINAINGON SA GINOO.

¹⁶⁷ Karon anaa na siya sa pinakadautan nga hugna, nga, nga iyang nahimutangan sukad-sukad, sumala sa Kasulatan. Ania na kita sa kapanahonan sa iglesiang Laodicea nga, “Usa ka dato, apan gibutahan nga kapanahonan sa iglesia, og wala mahibalo niini.”

¹⁶⁸ Wala gyu'y makita diha sa Biblia nga gipahigawas si Cristo sa iglesia, gawas lang sa kapanahonan sa Laodicea. Anaa na siya sa pinakadautan nga kapanahonan. Siya mao gayud ang pinakadautan. Miingon, “Nagalingkod ako nga sama sa usa ka rayna, og walay nakulang kanako.”

¹⁶⁹ “Ug wala ka mahibalo nga ikaw hubo, makaluluoy, buta, kabus, ug wala mahibalo niini.” Oo, sir. Giingnan siya, “Tambagan Ko ikaw, nga moari ug magpalit gikan Kanako og tambal nga ikadapat sa imong mga mata, aron Akong pagaablihan ang imong mga mata.” Ug kana'y—kana'y siguradong. . . Ang pangdihog sa mata nga iya sa Dios siguradong magadala gayud og Kahayag ngadto sa iglesia kung gusto sab niining ablihan ang iyang mga mata sa kung unsay gisulti sa Dios.

¹⁷⁰ Matikdi, sa gilayon karon. Karon, anaa na siya diha niana nga hugna, sa wala gayu'y pagduhaduha. Ania na kita sa kapanahonan sa iglesiang Laodicea.

¹⁷¹ Bueno, gikasaad na ang iyang mensahero, diha sa Malaquias sa ika-4 nga kapitulo. Gisaad na sa Dios nga buhaton kana. Ug ang iyang Mensahe mao ang magapabalik sa Pulong, magapabalik sa mga tawo ngadto sa Pulong. Mao nga dunay paghimugso. Tungod magaanak man siya, pinaagi sa bag-ong Pagkahimugso, sumala sa Malaquias 4.

¹⁷² Sa kalibutan sa iglesia karong panahona, adunay duha ka sistema nga nagapamuhat. Karon paminaw mo og ayo. Karon gusto kong masayran kung moingon ba kamo og “amen” mahitungod niini. Adunay duha ka sistema nga nagapamuhat sa kalibutan sa iglesia niining panahona. Tangtangon ko kini nga kabug-aton, ug dayon tapuson ko na kini. Nasayod kitang tanan nga kana mao ang Pulong sa Dios, ug ang sistemang pang-denominasyon. Mao kana ang duha ka sistema nga nagapamuhat. Sama lang nila, ni Jacob ug ni Esau; ang usa uyon sa Espiritu, pero ang laing usa uyon sa unod. Ug unsa man kadto? Nagaaway na si Esau ug si Jacob kaniadto sulod pa lang sa tagoangkan sa ilang inahan, bisan hangtud sa panahon nga nahimugso na sila. Ug mao usab ang nagakahitabo tali sa denominasyonhon ug sa Pulong, nga nagaaway, ang usa batok sa usa pa. Ingon na niana sila, sukad niadtong gihatud ni Luther ang unang repormasyon. Nanghinaut ako nga ingon ka yano kini nga inyo kining masabtan. Kita n’yo?

¹⁷³ Kini nga mga kalalaken-an, kung nasabtan nila *Kini* ug ilang isangyaw *Kini*, mas maipasabot nila *Kini*, kita n’yo, og maipahayag *Kini* sa punto nga mahimo n’yong masabtan. Ang gusto ko lang nga mailubong kining Binhi, dayon manghinaut ako nga himoon nila *Kini* nga mahimong Buhi. Matikdi. Kita n’yo?

¹⁷⁴ Ingon na niana sa una pa. Mao kana’y hinungdan nga nagaantus siya og mga kasakit sa pagpanganak, tungod kay aduna ma’y nagaaway diha sa sulod niya.

¹⁷⁵ Adunay Esau, nga usa ka tawo sa kalibutan, relihiyoso kaayo. Ug, oh, maayo man siya, buutan nga tawo, mahinlo, og matarung, kutob sa nasayran ko, apan wala gyud siya’y hibangkaagan mahitungod sa Pagkapanganay. Natawo man siya nga ingon na niana. Giumol siya nga ingon na niana.

¹⁷⁶ Ug si Jacob, dili ko igsapayan kung unsa man siya, tungod gitinguha man niya kadtong Pagkapanganay. Siya ang mao’y espirituhanon.

¹⁷⁷ Ug silang duha, sa karong panahon, anaa usab sulod sa tagoangkan sa iglesia. Adunay usa ka daku kaayo nga sistema nga gipanguhaang tukoron, nga gitawag og World Council of Churches. Ug gikan sa tagoangkan sa iglesia mogawas ang duha ka anak. Timan-i ninyo kining akong ginasulti. Ang kalibutan. . .

¹⁷⁸ Kinahanglan nga ihimugso sa Pulong ang Iglesia nga Pulong Pangasaw-onon. Gikan kaniya kinahanglan nga mahimugso ang Iglesia, ingon nga usa ka Pangasaw-onon alang kang Cristo. Silang mga nahikatulog sa tanang kapanahonan ang maglangkob nianang Pangasaw-onon nga migitib gikan sa Pulong nga ilang gigikanan, susama gikan sa imong mga tiil paingon sa imong ulo. Siya’y mas—mas nagakadaku, ug mas

nagakadaghan, ug uban pa. Maingon nga ang lawas nagatubo, nagatubo man usab ang Lawas ni Cristo. Ug dayon sa katapusan moabot na ang Ulo ngadto Niini, ang Ulo Niini, karon, kung atong matikdan, tungod kay Kini'y—konektado man Kining tanan ngadto sa Ulo. Ang Ulo mao ang nagamaniobra, og nagapamuhat.

¹⁷⁹ Apan kining mga sistema dili mahimong motubo gikan Niana, tungod kay usa man kini ka sistema, ug dili pud kini makapamunga. Ang amorseko dili man makapamunga og usa ka pungpong nga trigo. Apan pareho silang anaa sa mao ra nga umahan, og gibisbisan sa mao ra nga tubig, ug nasidlakan sa mao ra nga kahayag sa adlaw. Ang Usa mao ang Pulong; ang laing usa dili Pulong. Ug silang duha nagaaway. Dugay na silang nagaaway sukad pa sa unang repormasyon, ug hangtud karon nagaaway gihapon sila.

¹⁸⁰ Bueno, dili na ko angay'ng mosaysay pa og dugang mahitungod niana, dili ba? Siguradong kabalo na mo kung unsay akong ginahisgotan. Oo, sir. Ania na kita. Anaa kamo, sa usa ka sistema. Sa unsa nga sistema ka ba nahisakop?

¹⁸¹ Hunahunaa lang ninyo karon, kung nagkinabuhi man kamo sa kaniadtong mga adlaw, ilalum sa pag-uyog sa mga propeta sa Dios ug sa mga Pulong nga gipadayag, unsa kaha'y inyong gusto nga dapigan kaniadto?

¹⁸² Bueno, aduna gihapon kamo og mao ra nga pagpili sa karong panahon. Ngani andam na Siya nga ihimugso pabalik ang hingpit nga Pulong, ug nagaabot ang mao nga Pulong alang sa Pulong Pangasaw-onon. Maingon nga ang—ang babaye kabahin sa lalaki, ingon nga siya gikuha ra gikan kaniya, mao usab ang Iglesia nga kinahanglan mamahimong usa ka Iglesia nga nagapabilin-sa-Pulong, sa matag Pulong sa Biblia; dili sa mga sistema, mga dogma, o sa unsa man nga gidugang ra ngadto Niini. Kini kinahanglan nga usa gayud ka walay-sambog, putli, og ulay nga Pulong. Oo.

¹⁸³ Ug sa mga adlaw sa Kahayag ni Luther, sa diha nga gisirhan ang iglesia kaniadto, gipuwersang buksan kadto ni Luther. Nakasinati ang iglesia og mga kasakit, apan mitungha gihapon siya nga dala ang, “Mabuhi ang matarung pinaagi sa pagtoo. Ug *kini* dili mao ang komunyon.”

¹⁸⁴ Karon, hingsayran pud nato, nga, ilalum sa mga adlaw ni John Wesley, nakasinati na usab og mga kasakit ang iglesia, tungod aduna—aduna ma'y usa ka Wesley nga gihimugso. Apan unsa ma'y gibuhat niya? Mibalik siya gihapon sama sa gibuhat sa iyang inahan.

¹⁸⁵ Dayon ilalum sa mga adlaw sa mga pentecostal, gibiyaan kana nga butang sa inyong mga amahan ug mga inahan ug gidumtan kana. Nanagsangyaw sila diha sa dalan, nga wala nagasul-ob og stocking ang inyong inahan, nga nagapatugtog og

karaang lata, ug nagahisgot mahitungod sa bautismo sa Espiritu Santo, ug may dala-dala nga daang gitara. Atua sila sa mga agianan ug mga sakyanan, ug nanagpabilin sulod sa prisohan sa tibuok gabii. Ug kita’y pormal ra kaayo, ug namalik mismo ngadto sa organisasyon ug gipahimutang ang atong kaugalingon sa mao ra nga kahugawan, ug gipangdani pa ngadto niini ang ilang mga anak, butang nga gibiyaan na sa ilang mga ginikanan kaniadto. Kon nasayod lang sila siguradong dili gyud sila mahimutang sa ilang lubnganan. Igakaulaw gyud nila kamo. Nasayod ko nga masakit kana, apan mao kana ang Kamatuoran.

¹⁸⁶ Moingon mo, “Abi ko ba og imong gihigugma ang mga tawo.” Kung dili nagapanul-id ang gugma, nan unsaon mo man sa pagpahayag og gugma? Nagapanul-id ang gugma. Ug gihigugma ko ang kalibutan. . . ako’y—mainiton gyud ako alang sa iglesia sa Dios.

¹⁸⁷ Ug ang makita kining mga sistema nga mao’y nagagapus sa iglesia ilalum sa mga dogma, nga nagakadaut na. Ug bisan ginapahayag na sa Dios ang Iyang Pulong nga mao ang Kamatuoran, ug hangtud karon nagapanghawid ra gihapon sila niana. Amen. Tinuod kana. Nasayod man kamo nga kamatuoran kana, igsoong lalaki, igsoong babaye. Ingon niana gayud Kini. Mao kana ang yano nga paagi sa pagsulti Niini. Kini—dili kini paghatag og katin-awan sa Griyego, ug mga ingon niana, kondili kini mao’y paghatag og katin-awan ug pagpakita og sentido kumon. Siguradong makasabot na man mo Niana. Duha ug duha mahimong upat. Kita n’yo? Karon nasayod gyud kita nga husto Kana.

Bueno, ang Pulong kinahanglan nga maghimugso gayud og Pangasaw-onon.

¹⁸⁸ Apan ang daang sistema siguradong ipapabilin ra ang matang niini. Maghimugso gihapon kini og usa ka Esau nga gibaligya ang iyang pagkapanganay.

¹⁸⁹ Ania na kini. Mabati ko kini. Nanghinaut ko nga dili unta kamo maghunahuna nga nabuang na ako. Bueno, kung ako man, nan pasagdi lang ko ninyo. Maanindot man ang gibati ko nga ingon niini. Mas arang-arang man ko sa ingon-ining paagi kay sa ubang paagi. Ako—tingali’g nabuang na ako, para sa kalibutan. Pero ako—ako—nasayod gyud ako kon asa ako. Nasayod ako kon asa ako nagabarug.

¹⁹⁰ Matikdi. Maghimugso kana og usa ka bata nga patay na nga gipanganak, usa ka pang-simbahang sistema nga mao’y maghiusa sa tanang mga denominasyon, aron magpatungha og usa ka Esau nga magadumot kang Jacob. Amen. Nagalaum ako nga nasabtan ninyo kini, usa ka patay na nga gipanganak, nga denominasyon, silang tanan nga nagakahiusa na.

¹⁹¹ Oh, mga magtotoo sa Pulong, pasakop mo sa akong Mensahe. Patalinghugi n’yo ako, dili ang akong Mensahe, kondili ang

Iyang Mensahe nga hugot gayud Niyang ginapahayag ingon nga mao ang Kamatuoran. Kinahanglan na ninyong mopili sa kon asa man. Dili mo puedeng magpabilin nga hilom pagkahuman niini. Kinahanglan ninyong mopili.

¹⁹² Mahinumduman n'yo ba niadtong miaging adlaw, didto dapit sa Westward Ho, niadtong buntag, sa pagpamahaw, kon giunsa pagtugot kanako sa Ginoo nga maipakita kaninyo ang trigo? Kung unsa nga mitubo kini kang Luther, kang Wesley, ug ngadto sa pagka-uhay, ug uban pa, ug ang gagmay'ng mga sanga nga nagagawas, ingon nga ang matag iglesia girepresentar diha sa lindog. Dayon nagapaingon kini ngadto sa pagka-lugas, nga sama niana, ug napaingon kana sa pagka-tipaka, nga eksaktong mora na gyud og tinuod nga lugas sa trigo. Pero pag moadto ka ug imong tan-awon, kung wala ka makaila og trigo, nan makaingon gyud ka nga trigo ang anaa dinha, apan tipaka lang diay kana. Mao nga pag imong ablihan kanang tipaka, wala gyu'y trigo, dinha. Pero sa kinasuloran niana, aduna na diay og gamay'ng udlot sa kinabuhi nga migitib. Pagmogamit ka og lente ug tan-awon kana. Ug sa dihang mitungha ang Pentecostal, halos kapareho gyud kini, nga miingon si Jesus diha sa Mateo 24:24, "Malimbongan niini ang mismong mga Pinili kon mahimo pa." Unsa ma'y pagabuhaton niini? Sanggaon ang trigo. Husto ba kana? Bueno, ang uhay. . .

¹⁹³ Matikdi n'yo dinhi. Ang dahon dili gyud kapareho sa lugas nga nailubong, mao usab ang uhay, apan nagapaingon kini ngadto sa pagka-pareho. Ug mao nga ang tipaka halos kapareho na niini, apan dili gihapon kana mao ang lugas. Tigdala ra kana sa lugas.

¹⁹⁴ Dili ba ninyo makita kung giunsa pag-abot niadto nga mga mensahe nga inubanan og kasakit sa pagpanganak? Apan ang Kinabuhi nagabiya mismo gikan niana, aron mopaingon na sab sa sunod nga mensahe. Ang Kinabuhi mibiya gikan kang Luther, og mipaingon sa mensahe ni Wesley. Ug gikan sa mensahe ni Wesley, mipaingon na usab sa mensahe sa pentecostal. Karon panahon na usab, nga biyaan na ang tipaka. Unsa ma'y nagakahitabo? Makita n'yo dinha ang kinaiyahan, sa matag hugna, nga nagapahayag nga Kamatuoran kana.

¹⁹⁵ Karon nakita n'yo na kon nganong sa tan-aw ninyo nabuang na ako. Tingali'g nabuang na ako, sa ako nang gikaingon. Tungod aduna man gud og Butang sa kinasuloran ko. Dili ko Kini mapugngan. Dili man ako ang nagbutang Niini dinha. Wala Kini miabot sa kaugalingon kong pagpili. Ang Dios Kini. Ug ginapanghimatud-an Niya Kini, aron pamatud-an nga mao Kini ang Kamatuoran, og aron himoon Kini nga Kamatuoran. Dili ingon nga aduna ko'y unsa man nga batok kang Luther, ug kang Wesley, og sa mga Pentecostal, o sa mga Baptist, o kinsa man. Wala gyud ko'y unsa man nga batok kang bisan kinsa. Kondili ang mga sistema mao'y akong ginabatokan, tungod kay batok

man niana ang Pulong; dili sa mga tawo. Tan-awa n'yo kining mga pari ug mga ministro nga ania dinhi, karon. Wala unta sila maania dinhi kung naminaw pa sila sa sistema, apan aduna sila'y kaisog, tungod sa Pulong sa Dios, aron moanhi ug dawaton Kini. Ang *alleluyah* nagakahulogan og “dayega ang atong Dios.” Dili man kini makapadaut kaninyo. Nagakahulogan og “hinaut unta.” Nagatoo ako Niini. Nagatoo gyud ko ug nasayod nga mao Kini ang Kamatuoran. Gipanghimatud-an na Kini ingon nga mao ang Kamatuoran. Sa umaabot nga adlaw masayran ra ninyo, pero tingali'g ulahi na. Karon matikdi. Matikdi.

¹⁹⁶ Miingon ang Biblia, “Giandam na sa Iyang Asawa ang Iyang Kaugalingon,” sa katapusan sa kapanahonan. Giunsa man Niya pag-andam ang Iyang Kaugalingon, aron mamahimo Niyang Asawa? Ug unsa ma'y Iyang ginabuhat? Unsa ba nga matang sa bisti ang Iyang ginasul-ob? Ang Mismong Pulong ni Cristo. Nakabisti Siya sa Pagkamatarung ni Cristo. Mao kana. Husto kana. Kita n'yo?

¹⁹⁷ Ang panan-awon! Matikdi, sa pagtapos na karon. Gusto kong isulti kining usa ka butang sa dili pa ang pagtapos. Mao kana ang naggiya kanako para isulti kini. Karon, kini'y MAO KINI ANG GINAINGON SA GINOO. Kung duna ma'y tawong mosulti niini, nga wala'y, nga kinaugalingon niya lang nga panghunahuna, mamahimo siyang usa ka hipokrito ug mahiadto gayud sa impiyerno tungod niana. Husto kana. Kung paninguhaon niyang aghaton ang usa ka pundok sa mga tawo, buutang mga tawo nga sama niini, ug limbongan sila, aba, mamahimo siyang usa ka yawa diha sa tawhanong unod. Dili gyud siya pasidunggan sa Dios. Sa hunahuna n'yo pasidunggan kaha sa Dios ang usa ka yawa o ang usa ka bakak? Dili gayud. Kita n'yo? Nagalabay ra kini ibabaw sa ilang mga ulo, ug wala nila kini masabti. Pero ginapahigawas Niya ang mga Pinili.

¹⁹⁸ Matikdi n'yo ang tanang mga propeta sa tanang mga nangaging kapanahonan, kung giunsa sa Dios pagkuha sa mga Pinili.

¹⁹⁹ Matikdi, ang tanang mga nahitabo, bisan kaniadtong sa repormasyon. Sama, sa iglesiang Romano Katoliko nga gisunog si Joan of Arc, tungod siya'y usa kono ka balbal. Husto kana. Human niadto hingsayran nila nga dili diay siya ingon-adto. Siya'y usa kono ka santo. Siyempre, nagbuhat sila og mga pagpenitensya, gikalot nila ang lawas sa mga pari ug gipangtambog kadto sa suba. Pero, kabalo mo, wala kadto napasaylo diha sa mga basahon sa Dios. Wala. Gitawag usab nila si San Patrick nga usa ka santo, kono, nakita n'yo, pero siya'y halos kapareho ko lang gayud. Ug, atong matikdan, atong tan-awon ang iyang mga anak. Tan-awon nato ang iyang kahimtang, kaniadto, tan-awon nato kung unsa ka daghan ang mga gipamatay. Tan-awa n'yo diha sa listahan sa mga martir ug

hibaloa kung unsa ba ka daghan ang mga gipamatay kaniadto. Nakita n'yo, dili man unta kana ingon niana.

²⁰⁰ Tungod ginaangkon man sa mga tawo, wala nagapasabot nga ingon na niana. Kondili kung unsa gayud ang gisulti sa Dios ug gipamatud-an, nga mao ang Kamatuoran. “Sulayi ninyo ang tanang butang. Kupti ninyo kung unsa ang maayo.”

²⁰¹ Bueno hingsayran nato, karon, dinhi mga pila na ka bulan ang milabay, usa niadto ka buntag, sa nagalakaw-lakaw ako sa gawas sa balay, ug dihay mitungha nga usa ka panan-awon.

²⁰² Ug ginahagit ko ang si kinsa man dinhi, nga nasayod sulod niining daghang mga katuigan, nga mosulti, nga sa unsa mang higayon nga gipasulti ako sa Ginoo og “MAO KINI ANG GINAINGON SA GINOO” nga wala kana mahitabo. Pila kaninyo ang nasayod nga Tinuod kana? Ipataas ang inyong kamot. Oo. Aduna ba’y makasulti og sukwahi? Tinuod Kini.

²⁰³ Ayaw n'yo hatagi og unsa mang pagtagad ang mensahero. Kondili tan-awa n'yo ang Mensahe niini. Mao Kana. Kita n'yo? Dili kini. Ayaw tagda ang luoy'ng. . . [Blangko nga bahin sa teyp—Ed.] . . . opaw, nga tawo, kabalo mo, tungod kay—kay tawo ra siya, ug, ang tanan kitang tanan managsama ra man. Apan matikdi n'yo kung unsa na’y nagakahitabo. Mao kana ang nagapamahayag. Gidala ako. . .

²⁰⁴ Bueno, nasayod ko nga ang mga tawo nagasulti og tanan na lang nga matang sa mga butang, ug nasayod kita nga ang kadaghanan niini dili husto. Pero dili ko tulubagon kung unsa ma’y, ginasulti sa ubang tawo. Ang kinahanglan kong panubagon mao’y kung unsa ang akong ginasulti. Igasulti ko lang kung Tinuod ba kini, o dili. Ug ako—ako—manubag gayud ako niini, dili sa kung unsay ginasulti ni kinsa pa man. Dili pud ko makahukom ni bisan kinsa. Wala man ako gipadala aron maghukom, kondili aron nga iwali ang Mensahe. Matikdi.

²⁰⁵ Gipakita kanako kaniadto ang—ang pasiunang-pagpakita mahitungod sa Iglesia. Ug gikuha ako sa Usa Nga wala nako hikit-i, ug gipatindog ako, sa mora’g, usa ka entablado. Ug nadungog ko ang pinakamaanindot nga musika nga akong nadungog sukad-sukad. Ug nakita ko nga dunay, nagapadulong, usa ka grupo sa mga kababayan-an, nga mora og, mga, oh, mga baynte ang pangidaron, dise-otso, og baynte. Ug silang tanan dunay hatag-as nga buhok, ug nakabisti sila og nagkalainlaing mga bistida, matang, sa mga bistida. Ug nanagmartsa sila nga ingon gayud ka dungan samtang nagasubay, niadtong ritmo sa musika, kutob sa ilang mahimo. Ug miagi sila sa akong wala, nga padulong *niini* nga direksyon. Ug gitan-aw ko ra sila. Ug dayon mitan-aw ako aron tan-awon kung Kinsa ang nagapakigsulti kanako, pero wala ako’y nakita ni bisan kinsa.

²⁰⁶ Dayon nadungog ko usab nga dunay nagpadulong nga usa ka rock-and-roll nga banda. Ug sa pagtan-aw ko sa tuo ko

nga bahin, nagpadulong sa *niini* nga direksyon, nagpadulong, didto ang mga iglesia sa kalibutan. Ug ang pipila sa . . . Ang matag usa nanagdala sa ilang bandera, sumala sa kon asa sila naggikan. Usa kadto sa pinakamalaw-ay tan-awon nga mga butang nga akong nakita sukad-sukad sa tibuok kong kinabuhi! Ug sa pagtungaha na sa iglesiang Amerikano, mao kadto ang pinakangil-ad nga akong nakita sukad-sukad. Ang Langitnong Amahan mao man ang akong Maghuhukom. Nanagsul-ob sila niadtong abohon og puok nga mga sayal, sama sa usa niining mga babayeng anaa sa balay-imnanan, nga walay nakatabon sa likod, *dinhi* dapit; nagagunit sila'g abohon nga papel; ug nagasayaw sila og sayaw nga hula; nakameyk-ap pa; mugbo, og pinutlan ang mga buhok; nagapanigarilyo; ug nagakiaykiay, samtang nanaglakaw sila sa tugtog nga rock-and-roll.

Ug miingon ko, “Mao ba kana ang iglesia sa Estados Unidos?”

Ug mitubag ang Tingog, “Oo, mao kana.”

²⁰⁷ Ug sa paglabay nila, gigunitan nila kadto nga nakaingon *niini*, ug gitabon ang papel sa ilang likod sa paglabay nila.

²⁰⁸ Ako—misugod ako sa paghilak. Ako—nahunahuna ko, “Igsapayan sa tanan kong pagpangabudlay, ug sa tanan kong mga gibuhat.” Ug igsapayan sa tanan-tanan nga magkauban namong gipamuhat nga mga ministro. . . Ug, mga igsoon, ako—wala ako masayod kung unsa gyud ka daku ang inyong pagtoo mahitungod niini nga mga panan-awon; apan Kamatuoran gyud kini, para kanako. Tungod kanunay na kining napamatud-an nga tinuod. Sa pagkakita ko niadto, ug ingon nga nasayod ko kung unsay nagakahitabo, mora gayud og mahugno ang akong kasingkasing. “Unsa ma’y nabuhat ko? Giunsa ko man sa pagkapakyas niini? Nagpabilin man unta ako diha mismo sa Pulong, Ginoo. Ug giunsa ko man sa pagkapakyas niini?”

²⁰⁹ Nahunahuna ko, “Nganong gihatagan Mo man ako og usa ka panan-awon, dili pa lang dugay, ug gipakita kanako kung unsang mga anaa Didto? Ug ingon ko, ‘Bueno, kinahanglan ba silang pagahukman?’ Miingon Siya, ‘Ang grupo ni Pablo, usab.’ Ingon ko, ‘Giwali ko man ang mao rang Pulong nga iyang giwali kaniadto.’” Nagmantala gani ang Christian Business Men og artikulo mahitungod niini. Ug ingon pa ko, “Ngano? Nganong ingon niini man?”

²¹⁰ Nakita ko ang pundok sa mga bigaon nga nagaagi didto nga nakaingon niana, nakabisti og ingon niana, ug gitawag sila nga, “Ang iglesiang Miss U.S.A.” Halos nakuyapan ako.

²¹¹ Dayon, direkta kong, nadungog na usab kadtong maanindot kaayo nga musika, ug ania nagapadulong ang mao gihapong Pangasaw-onon nga nagaagi usab. Miingon Siya, “Mao kini sila ang mga nanggawas, bisan pa man.” Ug sa paglabay Niya, Siya’y kapareho gayud niadtong Usa nga unang miagi, nga nagalakaw

diha sa ritmo sa musika sa Pulong sa Dios, og nagamartsa. Ug sa pagkakita ko niadto, mitindog ako didto nga nakataas ang duha ka kamot, nagahilak, nga ingon *niana*. Sa dihang nakabalik na ko, nagatindog ako didto sa akong balkonahe, nga nagalantaw sa tibuok umahan.

²¹² Unsa man kadto? Siya'y mamahimong mao ra nga Pangasaw-onon, mao ra nga matang, nga giumol gikan sa mao ra mismo nga materyal kung unsa Siya kaniadto sa sugod pa lang. Karon basaha n'yo ang Malaquias 4 ug tan-awa kung dili ba kita sigurado nga makabaton og usa ka Mensahe sa kaulahiing mga adlaw, nga "magapabalik sa mga kasingkasing sa mga anak ngadto sa mga amahan," balik ngadto sa orihinal nga pentecostal nga Mensahe, nga Pulong sa Pulong gayud. Mga igsoon, ania na kita dinhi.

²¹³ Bueno, kini nga iglesia kinahanglan nga makadawat og usa ka ilhanan, ug kaulahiing ilhanan kini. Makita nato dinhi, sa-sa-sa Kasulatan, kita n'yo karon, kita n'yo, ang grabe nga mga kasakit sa pagpanganak nga nagakahitabo sa niining kapanahonan sa Laodicea. Nagahimugso kini. Ang ilang iglesia natawo na pag-usab. Dili . . .

²¹⁴ Dili na gayud magkaaduna pa og usa ka organisasyon. Nasayod ang si kinsa man nga sa matag panahon nga adunay mensahe nga migula . . . Pangutan-a n'yo kining mga magsasaysay. Human nga migula ang usa ka mensahe, duna gyu'y usa ka organisasyon nga nagatungha gikan niini; oh, sa kang Alexander Campbell, sa tanang uban pa, sa kang Martin Luther, ug tanan na. Nagatukod sila og usa ka organisasyon gikan niana. Ug kasagaran mga tulo ka tuig lang nagalungtad ang usa ka mensahe, ang rebaybal. Pero kinse ka tuig na kining nagapadayon, ug wala gyu'y organisasyon nga mitungha gikan niini. Ngano man? Tungod ang tipaka mao na man ang kaulahian. Ania na kita sa katapusan.

²¹⁵ Nakita n'yo ba ang maong mga kasakit sa pagpanganak? Nakita n'yo ba ang nagakahitabo? Ang mga nahabilin lang ang ipahigawas. Ang mga nahabilin lang ang mahimong ipahigawas. Ug mao kana kon ngano nga nagasinggit ako, ug nagapangabudlay, ug nagapadayon, ug ginahiklin ang tanang pagpahimuot diha sa tawo ibabaw sa yuta, aron nga makakaplag og kahimuot sa Dios, ug magapadayon lamang diha sa Iyang Pulong.

²¹⁶ Anaa na siya mismo sa kasakit. Mao kana'y nagakahitabo. Maghimugso na siya. Kinahanglan na niyang mohimo og pagpili. Ang sinulat-sa-kamot anaa na diha sa bungbong. Makita nato ang kalibutan nga andam na nga magun-ob. Husto kana. Ug makita pud nato ang iglesia, siya'y ingon na gayud ka daut, mao nga andam na usab siya nga malaglag. Ug anaa na gayud sa mga kasakit sa pagpanganak, ang kalibutan ug ang iglesia.

217 Ug aduna usab og usa ka bag-ong kalibutan nga haduol nang igaanak, ug usa ka bag-ong Iglesia nga igaanak, aron pagalalinon, alang sa Milenyum. Nasayod kita niana.

218 Matikdi. Gihatagan siya sa Dios. . . Ug paminaw mo pag-ayo niini, dayon tapuson ko na. Ang iyang katapusang ilhanan; ang iyang katapusang Mensahe, ang iyang katapusang ilhanan. Ang katapusan niyang ilhanan, mao ang, kinahanglan niya nga maanaa diha sa mga kahimtang nga sama kaniadto sa sinugdan; ang kalibutan, og ang iglesia.

219 Matikdi n'yo kung unsa kini kaniadto sa sinugdan, sa tanan niadtong mga katuigan, gawas kang, Malaquias hangtud kang Jesus. Matikdi n'yo kini, sa tanang mga katuigan kaniadto. Matikdi kini, ang tanan-tanan kaniadto, ang kadautan nga gikadangan nila. Tan-awa ang kalibutan, kung unsa ang nahitabo niini sa matag panahon, sama sa mga adlaw ni Noe, og uban pa. Kini kinahanglan nga mamaanaa sa mao gihapon nga kahimtang, ug makita na nato kana. “Maingon sa nahitabo kaniadto sa mga adlaw ni Noe.” Makita na nato kining mga kahimtang nga nagakapareho na gayud.

220 Dayon, makaangkon kita og usa ka katapusan nga ilhanan. Diha sa Lucas, sa ika-17 nga kapitulo, sa ika-28 nga bersekulo, miingon si Jesus, “Maingon sa nahitabo kaniadto sa mga adlaw sa Sodoma, mao man usab ang mahitabo sa pag-abot sa Anak sa tawo.” Kay, maingon sa nahitabo kaniadto sa Sodoma, kita n'yo. Bueno, nabasa mismo ni Jesus kining mao ra nga Biblia, og mao ra nga Genesis nga atong ginabasa. Karon, paminaw og ayo, ayaw ninyo pakyasa kini. Ang mao ra nga Biblia nga atong ginabasa, mao ra usab ang gibasa ni Jesus. Ug miingon Siya ngadto sa Iyang Iglesia, “Susiha ug tan-awa ninyo kung ang mga adlaw sa Sodoma nahibalik na pag-usab,” kon diin ang mga tawo balit-ad na, nawala na sa mga kalalaken-an ang natural nilang kinaiyahan.

221 Tan-awa n'yo ang mga bayot, kung unsa nga nagkadaghan na sila sa tibuok kalibutan sa karong panahon, sumala sa usa ka mantalaan bag-ohay pa lang. Adto gani mo sa akong opisina ug basaha n'yo ang mga sulat gikan sa mga inahan, para sa ilang mga batang lalaki. Ug nagkadaghan gayud ang mga bayot, sa tan-aw ko, og baynte o traynta porsyento na sila diha sa—sa California, pa lang, niadtong miaging tuig. Dunay usa ka dakung pundok sa. . . bisan ang mga tawo sa gobyerno, napamatud-an mismo nga mga bayot diay. Kamong mga opisyaes sa gobyerno nasayod man mo niana. Sa inyong magasin, mabasa ko kini, ug nagkalainlaing pang mga butang ang nagakahitabo. Kung inyong. . .

222 [Usa ka igsoong babaye ang nagasulti sa laing mga dila, ug dayon nagahatag siya og paghubad. Ang mao ra nga igsoong babaye nagasulti pag-usab sa laing mga dila, ug dayon

nagahatag na usab siya og paghubad. Blangko nga bahin sa teyp—Ed.]

223 Karon, kung husto ang pagsabot ko, dinhi, sa Kasulatan, eksaktong ingon niana mismo ang gisulti sa Dios nga mahitabo: “Pasagdi nga ang nagasulti og laing mga dila mag-ampo nga siya mismo ang mohubad.”

224 Tinuod kana. Gisulti ko man kaninyo ang Kamatuoran, mao nga ania ang Dios, nga nagapanghimatuod Niini. Mao Kini ang Kamatuoran. Tinuod kini.

225 Karon matikdi. Unsa gani ang kaulahiang Mensahe nga gisulti ni Jesus? “Maingon sa nahitabo kaniadto sa mga adlaw sa Sodoma,” karon matikdi n’yo, sa wala pa kaniadto gisunog ang kalibutan sa Gentil, og kalayo. Karon tinguhaa n’yo nga masabtan. Unsa ma’y nahitabo kaniadto? Adunay usa ka pundok sa mga tawo, dagaang nga mga miyembro sa iglesia, sama ni Lot ug sa iyang grupo didto sa Sodoma. Pero adunay usa pa ka tawo nga nahigawas na gikan didto. Wala man siya didto, sa sugod pa lang. Mao kadto si Abraham, ang maong nakabaton sa saad mahitungod sa umalabot nga anak. Nasabtan ba ninyo? Moingon og, “Amen.” [Nagaingon ang kongregasyon, “Amen.”—Ed.] Sige.

226 Ug, kaniadto, sa wala pa midangat ang sangkoanan sa paglaglag, nagpakita na ang Dios ngadto kang Abraham diha sa daghang mga porma, apan niining higayona nagpakita Siya ingon nga usa ka Tawo. Siya’y usa ka Tawo. Ug miduol si Abraham ngadto sa Dios.

Karon, moingon mo, “Dili man kadto usa ka Tawo.”

227 Kadto—kadto—kadto—ang Dios kadto nga anaa sa Tawo. Gitawag Siya ni Abraham nga, “Elohim.” Usa kadto ka Tawo.

228 Ug, matikdi, milingkod Siya, nga nakatalikod Siya sa balongbalong, ug miingon Siya, “Asa ba si Sarah, nga imong asawa?”

Miingon, “Anaa siya sulod sa balongbalong, sa likod Mo.”

229 Miingon, “Pagaduawaon Ko ikaw pagmoabot na ang panahon, nga gikasaad Ko kanimo.” Ug mikatawa si Sarah. Ug miingon Siya, “Nganong mikatawa man si Sarah?” Kita n’yo?

230 Bueno, mao kana ang nagakahitabo niadtong adlaw. Aron maipakita ang kaulahiing ilhanan nga nakita ni Abraham, ang Piniling pundok gipahigawas, pahilayo sa Sodoma. Karon, ayaw n’yo sipyata kini nga samingay, bisan unsa ma’y ginabuhay ninyo. Ang pundok nga gipahigawas, wala na man sa Sodoma, sa sugod pa lang.

231 Apan ang duha ka Manulonda miadto sa Sodoma. Ug sa pag-abot Nila didto, atong makaplagaan si Lot. Ug nakaplagaan Niya si Lot nga anaa sa pagka-backslide nga kahimtang, atua didto ang tanang mga bayot ug mga kahiwian. Kabalo na man mo sa maong estorya.

Apan dihay Usa nga nagpabilin uban ni Abraham, nga mao si Elohim.

²³² Giwali nila ang Pulong didtong dapita. Ang pagwali sa Pulong mao ang nagpabuta sa maong mga tawo, ug mao nga dili na nila makita ang pultahan. Ingon niana usab karong panahona.

²³³ Apan ang Usa nga atua uban sa pundok nga anaa sa gawas, nagbuhat og milagro sa atubangan ni Abraham, aron maipakita kung Kinsa Siya, ug atua Siya kauban ni Abraham.

²³⁴ Miingon Siya, “Nganong mikatawa man si Sarah?” mahitungod niadtong bata. Ug migawas si Sarah ug miingon nga wala kono siya mikatawa. Ug miingon, “Apan mikatawa gyud ka.” Ug mahimo Niya unta nga patyon si Sarah didto mismo kung dili si Sarah kabahin ni Abraham.

²³⁵ Mahimo usab kitang patyon sa Dios kung dili kita kabahin ni Cristo. Ang kalooy ni Cristo mao lang ang nagapapabilin kanatong tanan, kita nga mga maduhaduhaon ug magtutuis sa Pulong.

²³⁶ Apan, matikdi, matikdi kung unsay nahitabo. Milingi si Jesus ug miingon, “Maingon sa nahitabo kaniadto sa mga adlaw ni Lot, mao man usab ang mahitabo sa katapusang panahon sa diha nga sugod nang ginapadayag sa Anak sa tawo ang Iyang Kaugalingon.” [Blangko nga bahin sa teyp—Ed.] Kita n’yo? “Ang Anak sa tawo” kanunay, diha sa Biblia, mao’y usa ka *propeta*. Kita n’yo? Nagaanhi Siya sa tulo ka ngalan sa pagka-anak: Anak sa tawo, Anak sa Dios, Anak ni David. Kita n’yo? Ug ginapaila Niya ang Iyang Ngalan ingon nga, “Anak sa tawo,” tungod sa ingon-ana man nga buluhaton Siya nagapamuhat kaniadto, ingon nga usa ka *propeta*, magtatan-aw. Miingon Siya, “Sama sa nahitabo kaniadto sa mga adlaw ni Noe, sa diha nga sugod nang ginapadayag sa Anak sa tawo ang Iyang Kaugalingon, nan mao na kana ang katapusang panahon.”

²³⁷ Karon atong palandungon, sa makadiyut lang. Wala pa nagkaaduna sukad og usa ka mensahero ang kalibutan. Aduna kita kaniadto og Finney, Sankey, Moody, Finney, Knox, Calvin, og uban pa, sa tibuok kalibutan, mga mensahero para sa iglesia sa niining nangaging mga kasakit sa pagpanganak. Apan wala gayud kita nagkaaduna og usa ka tawo sukad-sukad nga nagasangyaw nga dala ang usa ka pang-tibuok kalibutan nga mensahe, hangtud niining adlaw, nga ang iyang ngalan naghinapos og h-a-m. A-b-r-a-h-a-m, nga dunay unom ka letra . . . ang A-b-r-a-h-a-m dunay pito ka letra.

²³⁸ Aduna kita’y usa sa karong panahon nga ginganlan og G-r-a-h-a-m, unom ka letra, ug ang unom mao man ang numero sa kalibutan, adlaw sa paglalang. Kanus-a ba ang kalibutan nagkaaduna og usa ka tawo sukad-sukad nga nagsangyaw, nagawali dinha sa *kosmos*, dinha sa kalibutan,

nagasinggit dinha sa mga tawo, “Paghinulsol, paghinulsol! Mangalaglag kamo, o panggula kamo dinha,” hangtud niini nga kapanahonan? G-r-a-h-a-m, tan-awa n’yo kung unsay iyang ginabuhat, nagawali sa Pulong, ginabutahan ang mga tawo didto, og nagasinggit, “Panggula na mo,” ingon nga usa ka mensahero gikan sa Dios. Miingon si Jesus nga mahitabo kana sa diha nga igapadayag na sa Anak sa tawo ang Iyang Kaugalingon. Karon, kana, hain man kana? Anaa dinha sa mga sistema sa iglesia, sa kalibutan. Ug hinayhinay nilang dumtan ang maong tawo, tungod niana.

²³⁹ Apan, hinumdumi, nga adunay usa ka pundok, usab, nga mao ang espirituhanong pundok, ang pundok ni Jacob, dili ang—dili ang pundok ni Esau. Adunay usa ka pundok ni Jacob nga nagapaabot alang sa maong anak, nga wala didto sa Babilonia, ug nakadawat sila og usa ka Mensahero. Nasabtan n’yo ba? [Nagaingon ang kongregasyon, “Amen.”—Ed.] Si Abraham, A-b-r-a-h-a-m, nakadawat sila og usa ka Mensahero. Ug kadto nga Mensahero, unsa man ang mahinungdanon, og mahimayaong butang nga Iyang gibuhat, aron ipakita kaniadto nga katapusang panahon kadto? Gitugkad Niya ang mga hunahuna nga anaa sa panghunahuna ni Sarah.

²⁴⁰ Ug si Jesus, ang Anak sa Dios, nga nahimong unod, nagapakita nga ang Espiritu sa Dios magabalik diha nianang diyutay’ng pinili nga Pundok sa katapusang panahon, ug igapadayag ang Iyang Kaugalingon sa mao gihapon nga paagi. Mga kasakit sa pagpanganak! Oh, igsoon, palihog tinguhaa n’yo nga masabtan. Paningkamoti gayud. Ablihi ang inyong mga kasingkasing sa makadiyut. Tan-awa n’yo si Cristo. Kanang mao ra nga Dios ania dinhi mismo karon. Kanang Mao sa gihapon. Gisaad na Niya kining mga butanga. Ug kung gisaad Niya ang mga niini, siguradong arang gyud Niyang tumanon kini.

²⁴¹ Iduko nato ang atong mga ulo sa makadiyut. Gusto ko nga mamalandong kamo mismo, nga maalampoon gayud.

²⁴² Amahan, anaa na kini sa Imong mga kamot karon. Nabuhat ko na ang tanan nga mahimo ko. Ginaampo ko nga tabangan Mo unta ang mga tawo nga—nga makasabot. Naitanum na ang Binhi. Ibubo ang tubig, ang Espiritu, diha Niini, Ginoo, ug bisbisi Kini alang sa Imong kahimayaan. Kung nasayup man ako, Ginoo, wala ko kana gituyo. Nagaampo ako, Dios, nga—nga pagahubaron Mo Kini nga husto, nganha sa ilang mga kasingkasing, aron nga ila gyud nga makita ug masabtan. Itugot kini, Ginoo. Nagaampo ako, sa Ngalan ni Jesus. Amen.

²⁴³ Ang Ginoo magapanalangin kaninyo. Gihigugma ko kamo. Kining Dios nga nagwali niining Pulong, kining Dios nga may katungdanan niining Pulong. . . ang katungdanan ko mao lamang ang pagsulti Niini. Siya na Mao ang maghatag og kinabuhi Niini. Kanang mao ra nga Dios ania mismo dinhi.

²⁴⁴ Karon, pila man ang anaa dinha nga dunay panginahanglanon? Ipataas ang inyong kamot. Gisaad ba Niya nga buhaton kining mga butanga sa kaulahiang mga adlaw? Karon tan-aw kamo kanako. Bueno sama ra sa gisulti ni Pedro ug ni Juan kaniadto, “Tan-aw kanamo.” Nga daw sa . . . Kita n’yo? Gisultihan niya ang maong tawo. Karon tan-aw mo dinhing dapita. Karon, palihog ayaw na mo paglakaw-lakaw. Tungod usa gayud kini ka . . . ako—gapaningkamot gyud ako, sa tibuok kong kasingkasing. Magmatinahuron gayud. Kita n’yo? Ang matag usa kaninyo, usa baya ka espiritu, pagmolihok kamo. Siyempre, usa kamo ka indibiduwal. Ug gapaningkamot man gud ko nga masalo ang pagtoo sa mga tawo.

²⁴⁵ Dunay usa ka luoy’ng babaye mga miagi kaniadto ug mihikap sa Iyang bisti, mihawa dayon ug milingkod. Gisultihan ni Jesus ang maong babaye kung unsay sakit niini, ug naayo siya.

²⁴⁶ Ug bueno nagsaad man Siya nga buhaton kana pag-usab, nga igapadayag sa Anak sa tawo ang Iyang Kaugalingon sama sa Iyang gibuhat sa Sodoma kaniadto. Ang kalibutan anaa na sa ingon-ana nga kahimtang. Ang iglesia usab anaa na sa ingon-ana nga kahimtang. Karon gituman ba sa Dios ang Iyang Pulong? Tan-awa n’yo kung gituman ba Niya, o wala. Oh, nagkaaduna kita og mga ilhanan, paglukso-lukso, pagsulti og laing mga pinulongan, pagpropesiya, og uban pa. Apan, kadali lang, aduna ma’y usa pa ka ilhanan. Oh, nagkaaduna pud kita og daghang karnal nga mga pagsundog-sundog. Nagapahimo lang kana sa usa ka tinuod nga mosidlak pa’g samut. Ang unsa mang mini nga dolyar mao ang nagapahimo sa usa ka tinuod nga mosidlak pa’g samut.

²⁴⁷ Karon mag-ampo kamo. Magtoo kamo. Basta, ako—ginahagit ko kamo nga buhaton kana. Tan-awa ninyo, ug toohi n’yo kung unsay gisulti ko kaninyo. Pila man ang nagatoo niini nga mao ang Kamatuoran? Dili ko igsapayan kung kinsa kamo, kung asa man kamo. Ako lamang. . .

²⁴⁸ Ang tanan nga ania dinhi, sa nasayran ko, mga estranyo gayud, gawas lang ni Bill Dauch ug iyang asawa nga anaa nagalingkod dinha, sa akong nahibaloan. Nagatoo ko nga nakaila pud ko niining magwawali dinhi nga taga Germany, nga nagalingkod dinha. Ug, ang igsoong lalaki, ug ang duha o tulo ka tawo usab nga nagalingkod dinha mismo.

²⁴⁹ Adunay usa ka tawo dinha sa luyo sa mga mananambong, tan-aw dinhi, dinha sa may luyo. Ginahagit ko ikaw nga toohan ang gisulti ko kanimo nga mao ang Kamatuoran.

²⁵⁰ Unsa pa kaha sa diha nga ang Manulonda sa Ginoo nga mikunsad didto sa suba, traynta’y-tres ka tuig na ang milabay, Siya ang nagpahayag niini? Giunsa ko man sa pagpakahibalo?

²⁵¹ Ug ang ako mismong pastor sa Baptist gipalagpot ako mismo sa iglesia, og miingon, “Ikaw—gidaman ka lang, Billy.”

252 Ingon ko, “Wala ako, gidaman, Dr. Davis. Kon ingon niana man ang imong, ang imong tan-aw niini, mas maayo pang bawion mo na lang akong fellowship kard.”

253 Nasayod ko nga aduna gyu’y tawo, sa kon asa man, nga motoo Niini. Dili man magpadala ang Dios og usa ka Mensahe kung walay tawo nga modawat Niini.

254 Oh, tinuod, sa diha nga nagaadto ako og nag-ampo alang sa mga may sakit, maayo pa kaayo kadto. Apan sa dihang misugod na ko sa pagsulti kaninyo sa Kamatuoran sa Pulong, nan nalahi na. Angay ninyong mahibaloan. Nga ingon na gayud niana sa matag Mensahe.

255 Pagkamaanindot pa kaayo ni Jesus sa dihang misulod Siya sa iglesia ug gipang-ayo ang mga tawo, ug tanan na. Apan usa niana ka adlaw sa dihang milingkod Siya, ug miingon, “Ako ug ang Akong Amahan usa ra,” oh, kadto, mao na kadto. “Gawas kon mokaon kamo sa unod sa Anak sa tawo, ug moinom sa Iyang Dugo, wala kamo’y Kinabuhi diha kaninyo.” Wala Niya Kadto gihatagan og katin-awan. Tungod gusto man Niyang makita kaniadto kung kinsa’y managpabilin Kaniya. Oo.

256 Unsa kaha sa hunahuna ninyo, ang giingon, sa—sa pundok sa mga tawo kaniadto uban ang mga doktor ug mga ingon niana, “Kana nga Tawo usa ka...Aba, usa gyud Siya ka bampira. Mokaon kono sa Iyang unod ug moinom sa Iyang Dugo?” Wala Niya Kadto gihatagan og katin-awan. Wala gayud Niya Kadto gihatagan og katin-awan.

257 Apan, bisan pa man, kadto nga Pulong minunot gihapon, niadtong mga apostoles. Dili kadto igsapayan kanila. Wala nila Kadto masabtan. Pero gitooan nila Kadto, bisan pa man. Kita n’yo? Nasayod sila, tungod nakita man nila ang mga buhat sa Dios, ug nasayod sila nga mao gayud kadto. Miingon Siya, “Kini mao ang nagapanghimatuod Kanako.”

258 Aniyay usa ka lalaki, og babaye nga ania mismo dinhi, nga nagpataas sa iyang kamot. Karon, mahimo n’yo akong tawgon nga usa ka panatiko, kung gusto ninyo; apan ang mao ra nga Haliging Kalayo, nga mao’y nanguna sa mga anak sa Israel kaniadto latas sa kamingawan, anaa mismo nagapaibabaw sa maong babaye.

259 Karon, hinumdumi, nga miingon si Jesus, “Sa diriyut lamang panahon ug ang kalibutan dili na makakita Kanako, apan kamo makakita Kanako. Gikan Ako sa Dios. Mobalik Ako ngadto sa Dios,” human sa Iyang pagkamatay, og paglubong. Gisultihan Niya ang mga Judio. Miingon Siya, “Ako...”

260 Siya mao ang Bato nga atua kaniadto sa kamingawan. Siya mao ang Haligi nga Kalayo, “AKO MAN ANG MAO AKO.” Si kinsa ba ang “MAO AKO”? Kadtong Haligi nga Kalayo sa nagadilaab nga sapinit. Husto ba kana? Ug Siya’y nahimong unod ug nagpuyo ipon kanato. Miingon, “Gikan Ako sa Dios,

ug mobalik ngadto sa Dios, aron nga mobalik diha sa porma sa Espiritu Santo.”

261 Ug mao nga ania Siya, uban kanato karong panahona, duna gani siyentipikanhong mga hulagway nga nakuha gikan Niini. Ania Siya mismo, aron pamatud-an ang labaw pa sa unsa mang siyentipikanhong hulagway, o unsa man. Ania Siya, aron pamatud-an kana, kay Siya man Kini. “Ako nga Anak sa tawo igapadayag na niining adlaw.” Karon, *mao* kana Siya. Nagalantaw ko mismo Niini.

262 Moingon mo, “Nakita mo ba Kana?” Nakita Kini ni Juan, usab, apan wala nakakita ang tanang uban pa kanila.

263 Tan-awa, ang pagpamatuod niini karon. Kana nga babaye usa ka estranyo kanako. Wala ko pa gyud siya—siya, nakita sa tibuok kong kinabuhi. Apan aduna siya’y problema diha sa usa sa iyang mga bitiis nga mao’y iyang ginaampo. Kana . . . Husto kana, gining. Naoperahan ka na tungod niana. Imoha kanang bana ang nagalingkod tupad nimo. Dili ka taga dinhi. Taga California ka. Ang imong ngalan mao si Roland. Ang imong sakit sa tiyan natapos na, usab, sir. Aduna ka’y sakit sa tiyan. Dili ba? Bueno, nawala na kana. Naayo na usab ang imong bitiis.

“Nianang adlaw ang Anak sa tawo . . .”

264 Dinhi, aniay usa pud ka lalaki, nga nagalingkod *dinhi* mismo. Usa siya ka itum nga lalaki, og adunay problema sa iyang mga mata. Siya’y usa ka . . . Oo. Siya, ang iyang trabaho, adunay siya’y ginabuhat sa usa ka sakyanan, nagapasinaw siya og mga sakyanan, tigpasinaw og sakyanan. Oo. Naggrabe na ang imong mga mata. Bag-ohay ka lang nga mitoo, dili ba? Dunay pagkatalagsaong butang nga nahitabo kanimo. Ang imong ngalan mao si Fred. Husto kana. Conn ang imong apelyido. Husto kana. Nagatoo ka ba karon? Kung ingon-ana ang imong mga mata dili na gyud maghasol kanimo. Wala ko pa nakita sukad ang maong lalaki sa tibuok kong kinabuhi.

265 Ang lalaki pud nga anaa dinha sa luyo mismo, dili siya taga dinhi, usab. Siya’y taga California. Aduna ka’y problema sa likod, Mr. Owens. Ikaw kana. Giayo ka na ni Ginoong Jesus. Wala ko pa pud nakita sukad ang maong lalaki, sa tibuok kong kinabuhi, og wala ko’y unsa man nga nahibaloan mahitungod kaniya. Nagasunod lang ko nianang Kahayag sa diha nga molihok Kini.

266 “Kung mahimo mong toohan, ang tanang butang mamahimo kanila nga nagatoo.”

267 Aniay batan-ong lalaki nga nagalingkod dinhi, nga adunay hernia, naka-antipara siya ug nagasul-ob og abohon nga amerikana. Fred, ayohon ka sa Dios kung toohan mo lang kini. Dawaton mo ba kini? Sige. Wala ko pa siya nakita sukad-sukad, sa tibuok kong kinabuhi.

268 Si Mrs. Holden, nga nagalingkod dinha sa atbang niya, nagaantus sa sakit sa mata. Wala ako makaila sa maong babaye, wala ko pa gyud siya nakita sukad sa tibuok kong kinabuhi, apan tinuod kana. Kita n'yo? “Kung mahimo mong toohan.”

269 Nganong nagahilak ka man, igsoong babaye? Aduna ka'y nagatukar-tukar nga nerbiyos, bronchitis, og sakit sa kasingkasing. Nagatoo ka ba nga ayohon ka sa Dios? Nagalingkod ka dinha sa tumoy nga lingkoranan. Kung motoo ka, sa tibuok mong kasingkasing, ayohon ka ni Jesus Cristo. Ang tanang pagkanerbiyos mobiya na kanimo, og mabati na nimo nga nahibalik ka na sa himsog mo nga kahimtang. Nagapamakak ra kanimo ang yawa. Dawaton mo ba kini? Karon ipataas ang imong kamot, moingon, “Dawaton ko kini, kung ingon-ana.” Okey. Tapos na kana.

270 Unsa man? Kining iglesia nagaagi na gyud og kasakit sa pagpanganak. Dili pa ba kamo mohimo sa inyong pagpili karon diha sa Iyang Presensiya? Gipakita ko na kaninyo ang Pulong sa ingon ka eksakto, kung unsay Iyang gisulti nga Iyang pagabuhaton.

271 Samtang naga-oberba mo dinhi niining bilding, pangutan-a n'yo ang si kinsa man nga napandongan ko na, o kaha naestorya na, o kung unsa man, ug hibaloa kung nakita ko na ba sila, kung nakaila ko kanila, o unsa man nga mahitungod kanila. Sa hunahuna n'yo mahimo kaha kana sa usa ka tawo? Imposible gayud kana nga mahitabo.

272 Bueno, unsa man Kini? Ang Anak sa tawo. “Ang Pulong sa Dios labi pang mahait kay sa espada nga duhay-sulab, nagapang-ila sa espiritu, sa mga tinago sa mga kasingkasing.” Eksaktong sama gayud sa nahitabo kaniadtong nahimo Kining unod dinhi ibabaw sa yuta, diha sa Anak sa Dios, og karon ginapadayag na Kini pinaagi sa Anak sa Dios sa diha nga mianhi Siya aron sa pagtawag og usa ka Pangasaw-onon pagawas niana nga sistema. “Panggula kamo gikan niana. Magpalain kamo, ang ingon sa Dios. Dili kamo maghikap sa ilang mahugaw nga mga butang, ug pagadawaton kamo sa Dios.”

273 Andam na ba kamo nga isurender ang tibuok ninyong kinabuhi ngadto sa Dios? Kung andam na kamo, tindog mo, og moingon, “Pinaagi sa grasya sa Dios, akong, pagadawaton Kini karon mismo, uban sa tanan-tanan nga ania kanako.”

274 Alleluyah! Dalaygon ang Dios! Nagatoo ba kamo Kaniya? [Nagaingon ang kongregasyon, “Amen.”—Ed.] Kung ingon niana ipataas lang ninyo ang inyong mga kamot ug mag-ampo uban kanako.

275 Isugid n'yo ang inyong kasaypanan. Mga kasakit sa pagpanganak! Malisud ang mamatay, apan kinahanglan mamatay mo karon mismo. Mamatay mo, og pangbiyai na kanang inyong mga dili-pagtoo. Panggula kamo gikan niana.

Kini mao ang Pulong sa Dios nga napadayag, sama lang kaniadto nga gikapadayag Kini sa diha nga mianhi si Jesus sa yuta. Kini'y si Jesus Cristo na usab sa inyong taliwala, nga napamatud-an na.

²⁷⁶ Nadawat sa gilayon ni Abraham ang usa ka anak, ang gikasaad nga anak, human nga nahitabo kadto.

²⁷⁷ Ug si Jesus moanhi pag-usab. Mao kana ang Iyang Espiritu. Siya'y haduol na kaayo sa yuta, haduol na kaayo nga moabot, nga andam Siya nga dawaton kamo, kung andam usab kamo nga dawaton Siya.

Karon ipataas ang inyong mga kamot ug mag-ampo uban kanako.

²⁷⁸ Ginoong Dios, ipapabilin ang tanang mga ministro diha sa altar. Itugot nga manghilak ang mga tawo. Hinaut nga ang Haliging Kalayo ug ang Haliging Panganod manglihok diha sa mga tawo karong adlaw ug himoa sila nga mga buutan, Ginoo, alang ngadto sa pagkaamgo sa Presensiya sa buhi ug gamhanan nga Dios. Itugot kini, Ginoo. Dawata sila. Ginaampo ko kini nga pag-ampo para sa matag usa kanila, sa Ngalan ni Jesus Cristo.

²⁷⁹ Pun-a ang matag usa sa Espiritu Santo, kinsang mga wala pa nakabaton sa Espiritu Santo. Ginoo, hinaut nga ang rebaybal sa niining dakung buluhaton, niini nga panagtigum, magresulta mismo og usa ka mahimayaon, og gamhanan nga pagbubo sa Balaang Espiritu. Hinaut nga mangaayo ang mga may sakit, makakita ang mga buta, makalakaw ang mga bakul. Hinaut nga ang kapadayagan sa buhi nga Dios maihatud diha sa atubangan sa mga tawo, maingon sa nahitabo niining hapon, ug hinaut nga madawat kini sa mga tawo. Ginapangamuyo ko kini, sa Ngalan ni Jesus Cristo.

²⁸⁰ Ipataas n'yo ang inyong mga kamot karon ug dayega ninyo Siya, ug dawata ninyo ang unsa man nga inyong gipangamuyo.



MGA KASAKIT SA PAGPANGANAK CEB65-0124
(Birth Pains)

Kining Mensahe ni Igsoong William Marrion Branham, una giwali sa Ingles niadtong Domingo sa hapon, Enero 24, 1965, para sa panagtigum sa Full Gospel Business Men's Fellowship International sa Ramada Inn sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org